

Kiswahili

Shule za Sekondari

Kitabu cha Mwanafunzi

Kidato cha Pili



Mali ya Serikali ya Jamhuri ya Muungano wa Tanzania, Hakiuzwi

Yaliyomo

Orodha ya majedwali	v
Vifupisho	vi
Shukurani	vii
Dibaji	viii
Sura ya Kwanza: Kuwasiliana kwa kuzingatia upatanisho wa kisarufi	1
Dhana ya ngeli za nomino na upatanisho wa kisarufi	1
Kuainisha ngeli za nomino kwa kuzingatia upatanisho wa kisarufi	4
Kutumia urejeshi kwa kuzingatia ngeli za nomino	9
Kuandika kifungu cha habari kwa kuzingatia upatanisho wa kisarufi	15
Zoezi la marudio	16
Sura ya Pili: Kutumia miundo changamani katika miktadha mbalimbali	18
Kubaini vipashio vya kimuundo	18
Kuzungumza kwa kutumia miundo changamani katika miktadha mbalimbali ..	26
Kuandika matini fupi kwa kutumia miundo changamani	29
Zoezi la marudio	30
Sura ya Tatu: Kusikiliza mazungumzo	33
Kusikiliza mazungumzo changamani kwa umakini na udadisi	33
Kusikiliza mjadala changamani na kuwasilisha mawazo makuu	38
Kusikiliza habari changamani na kuwasilisha mawazo makuu	40
Zoezi la marudio	42
Sura ya Nne: Kuwasiliana kwa ufasaha kwa njia ya mazungumzo	44
Kuzungumza kwa kutumia mitindo mbalimbali ya lugha	44
Kutumia ishara katika mazungumzo	49
Zoezi la marudio	52
Sura ya Tano: Kusoma kwa ufasaha na ufahamu	54
Kusoma kitunduizi matini ndefu changamani	54
Kuandika muhtasari wa hoja kuu na kutoa maoni	58
Zoezi la marudio	66
Sura ya Sita: Kuwasiliana kwa njia ya maandishi	67
Kuandika insha za wasifu za kisanaa	67
Kuandika insha za wasifu zisizo za kisanaa	69
Kuandika insha za hoja za kisanaa	70

Kuandika insha za hoja zisizo za kisanaa.....	72
Kuandika kumbukumbu za kikao.....	75
Zoezi la marudio.....	82
Faharasa.....	84
Bibliografia	86

Kuwasiliana kwa kuzingatia upatanisho wa kisarufi

Utangulizi

Upatanisho wa kisarufi ni hali ambayo nomino au kiwakilishi hukubaliana na maneno mengine hasa vitenzi na vivumishi katika tungo. Katika sura hii, utajifunza dhana ya upatanisho wa kisarufi na uainishaji wa ngeli za nomino kwa kuzingatia upatanisho wa kisarufi. Aidha, utajifunza kutumia urejeshi kwa kuzingatia ngeli za nomino. Kadhalika, utajifunza namna ya kuandika vifungu vya habari kwa kuzingatia upatanisho wa kisarufi. Umahiri utakaoujenga utakuwezesha kuwasiliana kwa usahihi na ufasaha katika miktadha mbalimbali kwa kuzingatia upatanisho wa kisarufi.

Fikiri



Mawasiliano bila kuzingatia upatanisho wa kisarufi

Dhana ya ngeli za nomino na upatanisho wa kisarufi

Ghani shairi lifuatalo, kisha jibu maswali yanayofuata.

Najitanua kwa lugha, zilo tamu za Kibantu,
Kwenye kila fani nipo, sayansi na insia,
Mwenzangu nimesikia, watu wakiulizana,
Kuhusu jina la ngeli, mabishano hayakomi,
Hunikuti kwa wageni, ni kwa Wabantu wenzangu tu.

Wauliza ngeli? Hilo nimetoa kwa wenzangu,
Wenzangu gani? Nimetoa kwa Wahaya,
Ndege wafananao, huruka pamoja,
Nomino, kama ndege, huruka pamoja pia,
Hunikuti kwa wageni, ni kwa Wabantu wenzangu tu.

Ngeli za nomino zifananazo, muungano hudumu,
 Viumbe hai na visivyo hai, ngelize haziungani,
 Ngeli sikai kiholela, mpango nazingatia,
 Upatanisho wa kisarufi, viambishi awali nazingatia,
 Hunikuti kwa wageni, ni kwa Wabantu wenzangu tu.

Ukitaka kunielewa, kiambishi usikosee,
 Ukikosea dhahiri, upatanisho tauharibu,
 Utachepua maana, kwa watumiaji wa lugha,
 Ukitaka tuendane, vitu na watu sichanganye,
 Hunikuti kwa wageni, ni kwa Wabantu wenzangu tu.

Kupatanisha kisarufi, uhusiano wa viambishi ndio mpango,
 Viambishi hupendana, upatanisho ni mshenga,
 Ukinipanga kiholela, maana taiharibu,
 Anisikilizaye na kunisoma, kamwe hatonieleva,
 Hunikuti kwa wageni, ni kwa Wabantu wenzangu tu.

Kiswahili najidai, sifa zangu mzomzo,
 Wauliza urejeshi, bila ngeli hujinadi,
 Uhusiano murua, wa vipashio zingatia,
 Ukisahau urafiki wa ngeli, urejeshi kupotoa,
 Hunikuti kwa wageni, ni kwa Wabantu wenzangu tu.

Maswali

1. Mshairi anaelezea nini katika shairi ulilolighani?
2. Shairi ulilolighani linaelezeaje asili ya ngeli?
3. Kwa kuzingatia shairi ulilolighani, nini maana ya ngeli za nomino?
4. Lipi ni wazo kuu la ubeti wa tano (5) wa shairi ulilolighani?
5. Kwa mujibu wa shairi ulilolighani, changamoto zipi zinaweza kujitokeza kutokana na kutozingatia upatanisho wa kisarufi katika sentensi?
6. Mshairi ana maana gani anaposema "Hunikuti kwa wageni, ni kwa Wabantu wenzangu tu"?
7. Katika shairi ulilolighani, ni sentensi zipi zimekiuka upatanisho wa kisarufi?

Zingatia

“Ngeli” asili yake ni neno la lugha ya Kihaya “engeli” lenye maana ya “aina”. Hivyo, ngeli za nomino ni aina au makundi ya majina ya watu, wanyama, vitu, hali na mahali kulingana na sifa za kisarufi. Upatanisho wa ngeli za kisarufi ni hali ya nomino au viwakilishi kukubaliana na vitenzi na vivumishi kwenye tungo. Kwa mfano:

Umoja	Wingi
(i) Mti ule umeanguka	Miti ile imeanguka
(ii) Mtoto yule anacheza vizuri.	Watoto wale wanacheza vizuri.
(iii) Kiti kizuri kimevunjika.	Viti vizuri vimevunjika.

Kwa hiyo, katika mfano wa kwanza, kiambishi cha umoja cha upatanisho wa kisarufi ni U- na cha wingi ni I-. Hivyo, viambishi hivyo vinaunda ngeli inayoitwa U-I. Katika mfano wa pili, kiambishi cha umoja cha upatanisho wa kisarufi ni YU-/A- na cha wingi ni WA-. Viambishi hivi vinaunda ngeli ya YU/A-WA. Katika mfano wa tatu kiambishi cha umoja cha upatanisho wa kisarufi ni KI- na cha wingi ni VI-. Viambishi hivi vinaunda ngeli ya KI-VI.

Kiambishi ni kipande cha neno ambacho hutokea kabla au baada ya mzizi wa neno. Kwa mfano, neno *anaimba* [a-na-imb-a] lina viambishi a-, -na-, na -a. Viambishi a- na -na- ni vya awali na -a ni kiambishi tamati.


Mzizi ni sehemu ya neno ambayo haibadiliki. Hivyo, mzizi ni kiini cha neno. Kwa mfano, katika neno *anaimba* [a-na-imb-a], mzizi ni -imb-.

Kuainisha ngeli za nomino kwa kuzingatia upatanisho wa kisarufi

Shughuli ya 1.1



Chunguza picha hizi, kisha fanya yanayofuata:



- (i) Tunga sentensi mbili katika umoja kwa kila picha.
- (ii) Andika wingi wa sentensi ulizozitunga katika kipengele cha (i)
- (iii) Bainisha viambishi vinavyoonesha upatanisho wa kisarufi unaojitokeza katika kila sentensi uliyotunga.

Zingatia

Ngeli za nomino huainishwa kwa kutumia vigezo mbalimbali vikiwamo umbo (viambishi vya umoja na wingi katika nomino), maana, na viambishi vya upatanisho wa kisarufi. Kigezo cha upatanisho wa kisarufi huainisha ngeli kwa kuangalia kupatana kwa nomino na maneno mengine katika tungo. Jina la ngeli husika hutokana hasa na viambishi vya upatanisho wa nomino na vitenzi. Kwa mfano:

(a) Shamba **limelimwa** - Mashamba **yamelimwa**. Nomino **shamba** ipo katika ngeli ya LI-YA.

(b) Uzi **umekatika** - Nyuzi **zimekatika**. Nomino **uzi** ipo katika ngeli ya U-ZI.

Katika mfano (a), kiambishi cha umoja cha upatanisho wa kisarufi baina ya nomino na kitenzi ni [LI-] na wingi ni [YA-].

Katika mfano (b), kiambishi cha umoja cha upatanisho wa kisarufi baina ya nomino na kitenzi ni [U-] na wingi ni [ZI-]. Hivyo, ngeli za upatanisho wa kisarufi za nomino katika mifano hiyo ni LI-YA na U-ZI.

Kwa kuzingatia kigezo cha upatanisho wa kisarufi, nomino za Kiswahili hugawanywa katika ngeli tisa kama zinavyooneshwa katika **Jedwali la 1.1**.

Jedwali la 1.1: Ngeli za nomino kwa kigezo cha upatanisho wa kisarufi

Na.	Aina ya ngeli	Viambishi	Mifano	
			Umoja	Wingi
1.	YU-/A- WA-	YU- A- } umoja WA-wingi	Mgeni yumo ndani. Mgeni amekuja. Ng'ombe amechinjwa asubuhi.	Wageni wamo ndani. Wageni wamekuja. Ng'ombe wamechinjwa asubuhi.
2.	U-I-	U- umoja I -wingi	Mkutano umeanza mchana. Mgomba umekatika.	Mikutano imeanza mchana. Migomba imekatika.
3.	LI-YA-	LI - umoja YA - wingi	Jembe limepotea. Papai limeiva.	Majembe yamepotea. Mapapai yameiva.
4.	KI-VI-	KI - umoja VI - wingi	Kijiko kinang'aa. Kitabu hiki kinasomwa.	Vijiko vinang'aa. Vitabu hivi vinasomwa.
5.	I-ZI-	I - umoja ZI - wingi	Kazi hii inatosha. Suruali itashonwa kesho.	Kazi hizi zinatosha. Suruali zitashonwa kesho.
6.	U-ZI-	U - umoja ZI - wingi	Uzi umekatika. Ukuta umebomoka.	Nyuzi zimekatika. Kuta zimebomoka.
7.	U-YA-	U - umoja YA -wingi	Uovu umezidi nchini. Ugonjwa umeenea.	Maovu yamezidi nchini. Magonjwa yameenea.
8.	KU-	KU-	Kusoma kuna manufaa. Kucheza kunafurahisha.	Kusoma kuna manufaa. Kucheza kunafurahisha.
9.	PA- MU- KU-	PA-MU- KU-	Hapa petu pamejaa. Humu ndani mna giza. Kule kunaonekana vizuri.	Hapa petu pamejaa. Humu ndani mna giza. Kule kunaonekana vizuri.


Shughuli ya

1.2



Chunguza kifungu cha habari kifuatacho, kisha jibu maswali yanayofuata.

Mwaka huwa na majira mbalimbali yakiwamo masika, kiangazi, vuli na kipupwe. **Masika** ni kipindi ambacho **mvua** nyingi hunyesha sehemu kubwa. Kipindi hiki huwa ni liwazo kwa wanyama na wakulima. Wakulima hupiga vigelegele, vifijo na **nderemo**. Katika kipindi hiki pia wakulima huwa na hekaheka na ari kubwa ya kulima mashamba kwa kutumia jembe la mkono, plau au trekta. Baada ya kulima, wakulima hupanda **mbegu** bora ili kupata **mazao** kwa wingi. Wahenga hawakukosea waliposema “**Jembe** halimtupi mkulima”. Kwa hakika, kila **mkulima** huvuna mazao kulingana na bidii yake. Hivyo, wakulima huona fahari kutekeleza kauli mbiu isemayo “Kilimo ni uti wa mgongo wa taifa letu”. Mavuno hutumika kwa chakula na mengine huuzwa ili kununua mahitaji muhimu. Licha ya **vigelegele** na furaha inayotokana na mvua, pia zipo hasara kwani kwa baadhi ya wakulima mambo huwaendea mrama. Hali hii inatokana na madhara yanayosababishwa na mvua kama vile mafuriko, ambayo huharibu mazao yao.



Siku moja usiku **mwezi** uliopita, Juma akiwa **usingizini**, ghafla alishtushwa na kelele za watu waliokuwa wanapiga **mayowe** wakisema “Maji! Maji! Maji! Nakufaaa! Uwiii! Nisaidieeee! Baada ya kuamka, aliona maji mengi yamejaa

ndani ya **chumba** alichokuwa amelala. Nje, watu walitapatapa na kukimbia huku na huko. Maji yaliyochanganyika na matope na mabaki ya mimea yalijaa kijijini na kufunika baadhi nyumba. Wakazi wa eneo hilo hawakuamini macho yao jinsi mto uliokuwa jirani ulivyojaa na kufurika. Usiku huo ulikuwa wa patashika **nguo** kuchanika. Kila mmoja alipambana kunusuru maisha yake. Kijiji chao na vijiji vya jirani vilikuwa vimekumbwa na **mafuriko** yaliyoharibu mashamba, mazao, na kuua mifugo, hivyo kusababisha **njaa**. **Methali** isemayo "Jembe halimtupi mkulima" haikufua dafu tena kwani jembe liliwatupa wakulima kutokana na mafuriko yalisomba mazao yao. Mafuriko yaliharibu pia makazi na miundombinu kama vile **barabara** na madaraja. Kutokana na kuharibika kwa miundombinu hiyo, mawasiliano baina ya vijiji yalikatika.

Serikali na watu binafsi walifanya jitihada za kuokoa waathirika wa mafuriko. Vijana na wapigambizi walisaidia kuokoa watu na mali zao. Waathirika walibebwa mgongoni, mabegani, na wengine kwenye **chombo** maalumu. Mimea iliyokuwa ikinesanesa usiku na mchana kwa shukurani, ilionekana kupoteza matumaini kwani yote ilikuwa imemezwa na **maji**.

Shughuli za **kiuchumi** zilizorota. Maji machafu yaliyotuma kwenye madimbwi yalitengeneza mazalia ya mbu na vimelea vingine, hivyo yalisababisha mlipuko wa **magonjwa**.

Haya yote yalisababishwa na baadhi ya wananchi kukiuka **sheria** ya uhifadhi na utunzaji wa mazingira kwa kujenga **makazi** karibu na vyanzo vya maji, hasa mito. Kile walichokipuuza sasa kimetokea. Walikumbuka maneno ya wahenga yasemayo "Mdharau mwiba, mguu huota tende" na "Sikio la kufa halisikii dawa". Pamoja na juhudi zilizofanyika kuokoa maisha ya wananchi, **serikali** ilifanya kazi bega kwa bega na wananchi kukarabati miundombinu iliyoharibiwa na mafuriko ili kurudisha hali ya kawaida ya wananchi.

Maswali

1. Kifungu cha habari ulichokisoma kinahusu nini?
2. Maneno yaliyokozwa wino yanapatikana katika ngeli zipi?
3. Kifungu cha maneno "Mimea iliyokuwa ikinesanesa" kipo katika aina ipi ya ngeli za upatanisho wa kisarufi?
4. Ni maneno gani katika kifungu cha habari ulichokisoma yanaingia katika ngeli ya YU-/A- WA- na ya I-ZI-?

Zoezi la 1.1

1. Kwa kila neno lililopo katika kisanduku, tunga sentensi mbili (2) moja katika umoja na nyingine katika wingi, kisha yapange maneno yaliyomo kwenye kisanduku katika ngeli za upatanisho wa kisarufi.

sahani	ubani	jiko
kuku	meno	ufa
ng'ombe	tunda	debe
sufuria	mtoto	Mungu
kikombe	karai	uzi
kalamu	dirisha	nyumba
pembe	gari	

2. Badili sentensi zifuatazo katika wingi, kisha bainisha viambishi vya upatanisho wa kisarufi kwa kupigia mstari.
- Chupa kubwa itapasuka isipohifadhiwa vizuri.
 - Mbuzi yumo zizini.
 - Mti mrefu umeangukia nyumba yetu.
 - Changu kizuri kimenunuliwa kwa bei ghali.
 - Yule mwembamba ameamisha kichwa kwa muda mrefu.
 - Ugonjwa huu ulienea kwa kasi nchini kwetu.
 - Uzi mwembamba umekatika leo asubuhi.
 - Saa ya ukutani ilipasuka ilipodondoka.
 - Jiwe la dhahabu linapatikana kwa nadra sana.
 - Uchoyo uliokithiri umemponza.
 - Kucheza kwake kunafurahisha.
 - Maziwa yameisha dukani kwao.
3. Bainisha makosa ya upatanisho wa kisarufi katika sentensi zifuatazo, kisha rekebisha makosa hayo kwa kuandika sentensi hizo kwa usahihi.
- Ndege unapaa angani taratibu.
 - Mtihani iliotangazwa imeahirishwa.
 - Tai nzuri atavaliwa.
 - Ukuta zimejengwa kwa matofali mabovu.
 - Ubao huu imechorwa picha nyingi.
 - Biashara litanipatia faida kubwa.
 - Kinanda hiki vinalia vizuri zaidi.
 - Mikeka hii zimenunuliwa.
 - Kiongozi kinakuja leo kwenye mkutano.
 - Mihogo zilipikwa vizuri.
 - Unga wa mahindi ilimwagika mashinini.

- (l) Madaftari mazuri wameletwa leo.
 (m) Kule unajaa maji sana.
4. Andika kifungu cha habari kwa kutumia ngeli mbalimbali za nomino, kisha bainisha nomino zinazoingia katika ngeli zifuatazo:
- YU-/A-WA-
 - KI-VI-
 - I-ZI-
 - U-I-
 - LI-YA-
5. Ni mambo gani ya msingi huzingatiwa wakati wa kubainisha ngeli za nomino kwa kigezo cha upatanisho wa kisarufi?

Shughuli ya 13



Tembelea maeneo mbalimbali yanayokuzunguka, kisha fanya yafuatayo:

- Orodhesha nomino tano (5) kwa kila kundi la nomino zifuatazo: watu, vitu, wanyama, matunda, mimea, mbogamboga, hali na mahali.
- Panga nomino hizo katika ngeli kwa kuzingatia upatanisho wa kisarufi, kisha weka kazi yako katika mkoba wa kazi.

Kutumia urejeshi kwa kuzingatia ngeli za nomino



Soma kifungu cha habari kifuatacho, kisha jibu maswali yanayofuata.

Mwagito ni kijana ambaye anaishi na wazazi wake katika Kijiji cha Ipulilo Mkoani Njombe. Baada ya kuhitimu kidato cha nne, aliazimia kuanzisha kilimo cha maparachichi kijijini kwao. Alijiseema kimoyomoyo "Ili niwe mkulima stadi wa kilimo hiki, ninahitaji kupata ushauri kutoka kwa wataalamu". Siku moja alimtembelea mzee maarufu pale kijijini aitwaye Likoko, aliyekuwa mkulima mzoefu wa maparachichi. Mzee Likoko alimkaribisha mgeni wake kwa bashasha. Mzee Likoko alianza kwa kusema, "Ninakupongeza sana kijana kwa kuamua kujiajiri katika kilimo hiki. Ni vijana wachache ambao wana uthubutu kama wako. Kwa hakika, utapata manufaa makubwa utakapozingatia yote nikuelezayo". Ili upate mavuno mengi, zao la maparachichi

linahitaji udongo unaopitisha maji vizuri na wenye rutuba ya kutosha. Baada ya kumweleza mengi kuhusu kilimo cha maparachichi, Mzee Likoko alimtembeza Mwagito katika mashamba yake ya miparachichi ili kushuhudia dhahabu hiyo ya kijani, kama wenyeji walivyosema. Mwagito alistaajabu kuona miparachichi yenye vimo tofautitofauti na iliyostawi mithili ya mitiki. Mwagito alihamasika kuanza kilimo hicho bila kuchelea. Alihakikisha anamuuliza maswali mwenyeji wake ili kuondoa madukuduku aliyokuwa nayo. Mwisho, alimshukuru Mzee Likoko kwa elimu aliyompa. Mzee Likoko aliitikia na kusema, "Udongo upate ungali maji". Kijana nenda kaanzishe kilimo hiki mapema iwezekanavyo. Niko tayari kukutembelea ili kuendelea kukusaidia zaidi". Mwagito alimuaga Mzee Likoko na kuondoka.

Mwagito aliporudi nyumbani kwake alikuwa na shauku kubwa ya kuandaa shamba ambalo alipewa na baba yake, Mzee Kimuli. Alitayarisha shamba lake kwa kuchimba mashimo yenye umbali wa kutosha kati ya shimo moja na lingine ili miparachichi ikue vizuri. Pia, aliandaa miundombinu ya umwagiliaji kipindi cha kiangazi na kuzuia mafuriko kipindi cha masika. Mara baada ya kuandaa shamba, aliagiza miche bora ya miparachichi kutoka kwa mtaalamu wa kilimo kama alivyoelekezwa na Mzee Likoko. Kabla ya kupanda, aliweka mbolea ya samadi ili kuongeza virutubisho kwenye udongo. Aliendelea kumwagilia maji ya kutosha hadi mvua iliponyesha. Miche ilipokua kiasi, aliongeza mbolea tena. Magugu yalipoota, Mwagito alipalilia shamba lake na alipulizia dawa ya kuua wadudu waharibifu walioshambulia miparachichi.

Baada ya miaka mitatu, miparachichi ilianza kutoa maua. Mwagito alipulizia viuatilifu na mbolea ya maji ili miparachichi istawi vizuri. Miezi michache iliyofuata, maparachichi yalikomaa na yalikuwa matamu sana. Wateja wengi waliyapenda na walimiminika kwa wingi kununua matunda hayo. Wateja hao waliuza matunda hayo ndani na nje ya nchi. Mwagito alifurahi kuona juhudi zake zikizaa matunda. Alisema, "Baada ya dhiki ni faraja; hakika utajiri unaanza kuninukia punde si punde". Fedha alizozipata kutokana na mauzo ya maparachichi alizitumia kwa kujikimu. Fedha zilizosalia alinunua mashamba katika vijiji vya jirani pamoja na kuhudumia shamba lake la awali. Kadiri siku zilivyosonga mbele, ndivyo Mwagito alivyopata mafanikio makubwa. Mwagito hakuwa mchoyo wa fadhila. Siku moja alimtembelea Mzee Likoko kwa ajili ya kumshukuru zaidi.



Mbali na faida za kiuchumi, Mwagito aliona fahari kwa kuwa mtunzaji mzuri wa mazingira. Pia, miparachichi ilitoa hewa safi pamoja na kivuli ambacho kiliwavutia wanyama na ndege kujisitiri mitini. Vilevile, kilimo hiki kilizuia mmomonyoko wa udongo na kuongeza rutuba kutokana na mboji ya majani ya miparachichi. Baada ya Mwagito kupata mafanikio, vijana wengine wa kijijini kwao walifuata nyayo zake kwa kuanzisha mashamba ya miparachichi. Mwagito alifurahi kuona kijiji chao kinastawi kutokana na vijana wengi kuwa na maisha mazuri.

Maswali

1. Habari uliyoisoma inahusu nini?
2. Maumbo gani ya urejeshi yamejitokeza katika habari uliyoisoma?
3. Unafikiri kwa nini viambishi vya urejeshi vilivyotumika katika habari uliyoisoma vinatofautiana?
4. Mwandishi anamaanisha nini anaposema 'Alijiseamea kimoyomoyo'?
5. Umpata mafunzo gani kutokana na habari uliyoisoma?

Zingatia

Urejeshi ni dhana ya kisarufi inayoonesha tendo la kurejeshwa kwa nomino tajwa katika sentensi. Katika lugha ya Kiswahili, urejeshi huoneshwa kwa kutumia viambishi patanishi vya urejeshi. Viambishi hivi huweza kupachikwa ndani ya kitenzi (kabla ya mzizi) au mwishoni mwa kitenzi. Vilevile, viambishi vya urejeshi huweza kupachikwa katika umbo **amba-**.

Kwa mfano:

(a) Kiambishi rejeshi kabla ya mzizi:

- (i) Vifaranga walioletwa wana afya nzuri.
- (ii) Humo ulimoingia mnatisha.
- (iii) Tabibu anayekuja atakuhudumia kwa umakini.
- (iv) Mwanafunzi anayesoma kwa bidii hufaulu mtihani.

(b) Kiambishi rejeshi mwishoni mwa kitenzi

- (i) Jambo lisemwalo linasikitisha wengi.
- (ii) Nyumba ijengwayo ni ya babu.
- (iii) Mtu aishiye hapa ni mjomba wangu.
- (iv) Mwanafunzi apigaye kelele, ataadhibiwa.

(c) Kiambishi rejeshi kwenye umbo amba-

- (i) Kitabu ambacho nimenunua, kimepotea.
- (ii) Shule ambayo nimesoma, iko mbali.
- (iii) Kijana ambaye hana nidhamu hafanikiwi.
- (iv) Kamba ambazo umenunua zimekatika.

Katika mifano hiyo, viambishi vilivyokolezwa wino ni viambishi rejeshi. Viambishi hivyo vinafanya tendo lirejeshwe kwa nomino tajwa.

Urejeshi hufuata mfumo wa ngeli za upatanisho wa kisarufi. Hivyo, viambishi rejeshi hupatana na nomino kulingana na mfumo wa ngeli za upatanisho wa kisarufi.

Urejeshi kulingana na ngeli za nomino unaoneshwa katika **Jedwali la 1.2.**

Jedwali la 1.2: Viambishi rejeshi kulingana na ngeli za nomino za upatanisho wa kisarufi

	Aina ya ngeli	Viambishi vya ngeli	Viambishi vya urejeshi	Mifano
1.	YU-/A-WA	YU- A- WA-	-YE- -YE- -O-	Mbuzi aliyepotea yuaja zizini. Mbuzi aliyepotea yumo zizini. Mbuzi waliopotea wamo zizini. Mzazi aliyekuja ametoa zawadi. Wazazi waliokuja wametoa zawadi.
2.	U - I	U- I- .	-O- -YO-	Mti ulionipa umestawi. Miti uliyonipa imestawi.
3.	LI-YA	LI- YA-	-LO- -YO-	Koti lililofuliwa limekauka. Makoti yaliyofuliwa yamekauka.
4.	KI-VI	KI- VI-	-CHO- -VYO-	Kiazi ulichopanda kimeota. Viazi ulivyopanda vimeota.
5.	I-ZI	I- ZI-	-YO- -ZO-	Kalamu iliyonunuliwa imepotea. Kalamu zilizonunuliwa zimepotea.
6.	U-ZI	U- ZI-	- O- -ZO	Uzi ulioshonea umekwisha. Nyuzi ulizoshonea zimekwisha.
7.	U-YA	U- YA-	- O- -YO	Uovu uliokithiri ukomeshwe Maovu yaliyokithiri yakomeshwe
8.	KU-	KU-	-KO-	Kucheza kusikovutia kunachosha. Kuchora kwake kulikozoeleka kutazingatiwa.
9.	PA-MU-KU-	PA- MU- KU-	-PO- -MO- -KO-	Hapo ulipokaa pamelowa. Humo ulimoingia mmejaa. Huko unakokwenda hakuna kitu.

Shughuli ya 1.4



1. Tumia vyanzo kama vile maktaba au mtandao kusoma hadithi mbalimbali, kisha fanya yafuatayo:
 - (a) Chambua majina matatumatatu ya vitu, watu, wanyama na hali, kisha tunga sentensi zilizo katika umoja na wingi kwa kutumia urejeshi.
 - (b) Bainisha viambishi vya urejeshi na ngeli katika kila sentensi, kisha hifadhi kazi kwenye mkoba wa kazi.
2. Buni mada uipendayo, kisha andika kifungu cha habari chenye viambishi vya urejeshi kwa kuzingatia upatanisho wa kisarufi.

Zoezi la 1.2


1. Bainisha viambishi vya urejeshi katika sentensi zifuatazo:
 - (a) Chungu unachokipenda kimevunjika.
 - (b) Vyungu ambavyo mlivipenda vimevunjika.
 - (c) Sukari tunayoisubiri haijaja.
 - (d) Ugonjwa nilioupata unatibika.
 - (e) Magonjwa niliyoyapata yanatibika.
 - (f) Nguo uliyoishona imechanika.
 - (g) Nguo ambazo ulizishona zimechanika.
 - (h) Mule alimomkuta munatisha.
 - (i) Mahali ambapo ulipakataa panauzwa.
 - (j) Ukuta alioujenga umedondoka.
 - (k) Kuta alizozijenga zimedondoka.
 - (l) Mafuta ambayo niliyanunua yamemwagika.
 - (m) Kule walikokuchagua kuna maslahi makubwa.
 - (n) Kucheza ulikokufurahia kunachekesha.
2. Bainisha aina ya ngeli kwenye sentensi zilizopo katika swali la 1.
3. Unafikiri ni kwa namna gani urejeshi unahusiana na ngeli za nomino?
4. Tunga sentensi kumi (10) zenye urejeshi za ngeli tofauti.

Kuandika kifungu cha habari kwa kuzingatia upatanisho wa kisarufi

Shughuli ya 1.5



Chunguza picha ifuatayo, kisha andika kifungu cha habari kwa kuzingatia upatanisho wa kisarufi.



Zingatia

Kifungu cha habari huweza kubeba taarifa au ujumbe kuhusu mtu, vitu, hali, tukio au jambo fulani. Kifungu cha habari hupaswa kuandikwa kwa kuzingatia mtiririko mzuri, unaojumuisha mwanzo, kiini na mwisho. Mtiririko huo unapaswa kuwa na mantiki, yaani kuwa na ushikamani wa maana na kisarufi. Pia, uwasilishaji wa taarifa au ujumbe katika kifungu cha habari vinapaswa kuwa na maana kwa wasomaji, yaani kizingatie hadhira husika na muktadha wao. Aidha, kifungu cha habari kinachoandikwa kinapaswa kitoa taarifa sahihi na halisi. Hali hii humlazimu mwandishi kutafuta taarifa kutoka vyanzo sahihi kuhusu jambo analoliandikia. Vilevile, kifungu cha habari kinapaswa kutumia lugha rahisi, yenye mvuto, na inayoeleweka kwa walengwa. Kadhalika, uandishi wa kifungu cha habari unapaswa kuzingatia kanuni za kisarufi.

Zoezi la marudlo

1. Jibu maswali yafuatayo kwa kuandika herufi ya jibu sahihi.

(i) Mende anapenda kula uchafu. Neno lililopigiwa mstari lipo katika ngeli ipi?

- (a) KI-VI
- (b) U-I
- (c) A-WA
- (d) KU
- (e) LI-YA

(ii) _____ mna watu wengi.

- (a) Aliingia
- (b) Alipoingia
- (c) Alikoingia
- (d) Alivyoingia
- (e) Alimoingia

(iii) Neno "papai" linaingia katika ngeli ipi?

- (a) LI-YA
- (b) U-ZI
- (c) U-YA
- (d) KI-VI
- (e) PA-MU-KU

(iv) "Shangazi yuko shambani". Neno lililopigiwa mstari katika sentensi hiyo lipo katika ngeli gani ya upatanisho wa kisarufi?

- (a) I-ZI
- (b) YU-A-WA
- (c) PA-MU-KU
- (d) KI-VI
- (e) U-I

(v) Uzi ulionunuliwa umekatika. Kiambishi rejeshi -o- kipo katika ngeli ipi?

- (a) I- ZI
- (b) KU-
- (c) U-YA
- (d) U-I
- (e) U-ZI

2. Jaza nafasi zilizoachwa wazi kwa kutumia maneno sahihi.

- (i) Kiini cha neno huitwa _____
- (ii) Urejeshi hujitokeza katika vitenzi na _____
- (iii) Ngeli za nomino kwa kigezo cha upatanisho wa kisarufi huainishwa kwa kuzingatia ushikamani wa _____ katika _____
- (iv) Nyumba yetu imepakwa rangi nzuri. Kiambishi _____ huonesha upatanisho wa kisarufi.
- (v) Maumbo yaliyokozwa wino katika neno **m-na-lo-li-penda** huitwa _____
- (vi) Mzigo aliousubiri umepotea. **-o-** ni kiambishi cha _____
- (vii) Makundi ya majina kwa kuzingatia sifa za kisarufi hujulikana kama _____

3. Tofautisha dhana zifuatazo huku ukitoa mifano:

- (a) Kiambishi na mzizi
- (b) Kiambishi awali na tamati
- (c) Kiambishi cha urejeshi na kiambishi cha upatanisho wa kisarufi

4. Kwa kutumia mifano, husianisha upatanisho wa kisarufi na urejeshi.

5. Kwa kutumia viambishi ngeli vya urejeshi, tunga sentensi kumi, kisha bainisha viambishi vya urejeshi ulivyovitumia.

6. Chagua mada moja kati ya hizi zifuatazo, kisha andika kifungu cha habari kwa kuzingatia upatanisho wa kisarufi.

- (a) Usalama wa barabarani
- (b) Athari za madawa ya kulevya
- (c) Rushwa ni adui wa maendeleo
- (d) Watoto wanaoishi katika mazingira magumu

Kutumia miundo changamani katika miktadha mbalimbali

Utangulizi

Watumiaji wa lugha huwasiliana kwa kutumia miundo mbalimbali ikiwemo miundo changamani. Katika sura hii, utajifunza kuzungumza na kuandika kwa kutumia miundo changamani ya sentensi katika miktadha mbalimbali. Umahiri utakaoujenga utakuwezesha kutumia miundo changamani katika miktadha mbalimbali ya mawasiliano.

Fikiri



Ingekuwaje mawasiliano yangetumia muundo mmoja tu wa sentensi.

Kubaini vipashio vya kimuundo



Tamba majigambo yafuatayo, kisha jibu maswali yanayofuata.

Sentensi: *Mimi ndiye mama, mwenye watoto watatu,
Kuzaa kwa mpango, hakika sikukosea,
Nikawapa majina, majukumu kutekeleza,
Sahili, Changamani na Ambatani kwa miundo.*

Sahili: *Nani anayebisha, dada yao utata sina,
Kutulia kwa hakika, beba wazo kuu moja,
Kitenzi kikuu moja, ukitunga hutetereki,
Kisaidizi kadhalika, kuipamba sentensi,
Mdogo wake shirikishi, kaongeza uhusiano.*

Changamani: *Mi wa pili ni Changamani, sentensi kuitunza,
Kuujaliza muundo, vishazi kutegemeana,
Changamani kwa miundo, mimi ni mahiri,*

*Naunga vishazi huru, pamoja na vitegemezi,
Kusaidia tegemezi, vishazi huru kunisitiri.*

*Sikutaka omboleza, n'kajiongeza kwa hakika,
Kuweka mbili tegemezi, na sahili karibisha,
Ngali na ngeli niliwaza, kuchukua tegemezi,
Tungo zilokamilika, kwa maana iloshiba.*

Ambatani:

*Kuunganisha mwanana, mimi kutia fora,
Kwa muundo stahiki, mamangu kumpamba,
Naunganisha Sahili, kwa viungo maridhawa,
Mimi sikuwa bahili, kuijenga yangu tungo.*

*Namuweka Changamani, katika wake muundo,
Na Sahili ikatungwa, kutumia viunganishi,
Sahili mbili zaidi, kuijenga yangu tungo,
Kuwamiliki Sahili, sambamba na Changamani.*

Sentensi:

*Ili kuijenga nyumba, isokuwa matata,
Furahisha wapangaji, na wale walo wenyeji,
Tungo kuzing'amua, na lugha kuitanua,
Mawazo kushikamanisha, lugha kuijenga.*

Maswali

1. Kutokana na majigambo uliyotamba, aina za sentensi ni zipi?
2. Kutokana na majigambo hayo, fasili ya kimuundo ya sentensi ulizozibainisha katika swali la 1 ni ipi?
3. Unadhani sentensi sahili na ambatani huwa na miundo gani?
4. Mshairi anaposema "Kuweka mbili tegemezi na sahili nakaribisha" anamaanisha nini?

Zingatia

Lugha ina vipashio vinne vya kimuundo ambavyo ni neno, kirai, kishazi na sentensi. Kipashio cha chini kabisa au cha msingi ni neno. Lugha yoyote ina aina mbalimbali za maneno. Maneno huungana kuunda tungo virai. Kwa mfano, nomino **mtoto** na kivumishi **mzuri** huungana na kuunda kirai nomino **mtoto mzuri**.

Kipashio cha pili ni kirai. Kirai ni neno au kifungu cha maneno kinachotawaliwa na neno kuu peke yake au neno kuu na kijalizo. Kijalizo ni neno au kikundi cha maneno kinachokamilisha neno kuu katika kirai.

Ifuatayo ni mifano ya virai

- Mtoto anacheza (Katika tungo hiyo, neno "mtoto" ni kirai nomino kilichoundwa na neno kuu peke yake, na neno "anacheza" ni kirai kitenzi kilichoundwa na neno kuu peke yake)
- Mtoto mpole (Tungo hii ni kirai nomino kilichoundwa na neno kuu ambalo ni "mtoto" na kijalizo ambacho ni neno "mpole")
- Cheza taratibu (Tungo hii ni kirai kitenzi kilichoundwa na neno kuu ambalo ni "cheza" na kijalizo ambacho ni "taratibu")

Kuna aina tano za virai, ambazo ni kirai nomino (KN), kirai kitenzi (KT), kirai kivumishi (KV), kirai kielezi (KE) na kirai kihusishi (KH). Kirai nomino ni neno au kifungu cha maneno, ambacho neno lake kuu ni nomino au kiwakilishi. Kirai nomino huweza kuundwa na nomino au kiwakilishi peke yake; nomino au kiwakilishi na kivumishi kimoja au zaidi; nomino au kiwakilishi na kirai kihusishi; au nomino na kishazi tegemezi. Kwa mfano:

- Shule imefungwa: (Neno shule ni KN kilichoundwa na nomino peke yake)
- Mwalimu mkuu: (Tungo hiyo ni KN kilichoundwa na nomino "mwalimu" na kivumishi "mkuu")
- Darasa la tano: (Tungo hiyo ni KN kilichoundwa na nomino "darasa" na kirai kihusishi "la tano")
- Mtoto aliyepotea jana: (Tungo hiyo ni KN kilichoundwa na nomino "mtoto" na kishazi tegemezi "aliypotea jana")

Aina nyingine ni kirai kitenzi. Hiki ni neno au kifungu cha maneno, ambacho neno lake kuu ni kitenzi kikuu au kitenzi kishirikishi. Kirai kitenzi kinaweza kuundwa na kitenzi peke yake au kitenzi na kirai nomino; kitenzi na kielezi au kirai kielezi; au kitenzi na kirai kihusishi. Kwa mfano:

- Babu amelala: (neno lililopigiwa mstari ni KT kilichoundwa na kitenzi kikuu peke yake).
- Askari yule ni mzembe: (Tungo iliyopigiwa mstari ni KT kilichoundwa na kitenzi kishirikishi **ni** na kivumishi **mzembe**).
- Mwalimu amenunua kalamu nyekundu: (Tungo iliyopigiwa mstari ni KT kilichoundwa na kitenzi kikuu **amenunua** na kirai nomino **kalamu nyekundu**).
- Rafiki yangu anaongea taratibu sana: (Tungo iliyopigiwa mstari ni KT kilichoundwa na kitenzi kikuu **anaongea** na kirai kielezi **taratibu sana**).
- Wanakijiji wanalima kwa matrekta: (Tungo iliyopigiwa mstari ni KT kilichoundwa na kitenzi kikuu **wanalima** na kirai kihusishi **kwa matrekta**).

Pia, kuna kirai kivumishi, hiki ni neno au kifungu cha maneno, ambacho neno lake kuu ni kivumishi. Kirai kivumishi huundwa na kivumishi kimoja au zaidi; kivumishi na kielezi; au kivumishi na kirai kihusishi. Kwa mfano:

- Mtoto mrefu: (Neno lililopigiwa mstari ni kivumishi).
- Kalamu nyeusi sana: (Tungo iliyopigiwa mstari ni KV kilichoundwa na kivumishi **nyeusi** na kirai kielezi **sana**).

- (c) Hekima ni mkali wa hesabu: (Tungo iliyopigiwa mstari ni KV kilichoundwa na kivumishi **mkali** na kirai kihusishi wa **hesabu**).

Vilevile, kuna kirai kielezi, ambacho ni neno au kifungu cha maneno, ambacho neno lake kuu ni kielezi. Kirai kielezi kinaweza kuundwa na kielezi kimoja au zaidi; Kwa mfano:

- (a) Upendo anasoma kimyakimya: (Neno lililopigiwa mstari ni KE kilichoundwa na kielezi **kimyakimya**).
- (b) Wewe unatembea harakaharaka sana (Tungo iliyopigiwa mstari ni KE kilichoundwa na vielezi viwili ambavyo ni **harakaharaka** na **sana**).

Kirai kingine ni kirai kihusishi. Hiki ni neno au kifungu cha maneno kinachotawaliwa na neno kuu ambalo ni kihusishi. Mfano wa vihusishi vya Kiswahili ni *ya, cha, vya, kwa, mwa, pa, za, kwenye* na *katika*. Kirai hiki kina muundo wa kipekee kwa sababu neno lake kuu ambalo ni kihusishi halijitoshelezi kimaana. Hivyo, neno hilo hukamilishwa kimaana kwa kijalizo chake ambacho ni kirai nomino. Kwa mfano:

- (a) Sufuria ya chuma: (Tungo iliyopigiwa mstari ni KH kilichoundwa na kihusishi **ya** na nomino **chuma**).
- (b) Kalamu ya wino mwekundu: (Tungo iliyopigiwa mstari ni KH kilichoundwa na kihusishi **ya** na kikundi nomino **wino mwekundu**).

Kipashio cha tatu ni kishazi. Hiki ni kikundi cha maneno kilichoundwa na kirai nomino na kirai kitenzi. Kwa mfano,

- (a) **Mtoto yule** amefaulu mtihani.
- (b) **Mtoto yule** aliyefaulu mtihani

Mifano hiyo ni vishazi na vimeundwa na kirai nomino na kirai kitenzi. Sehemu iliyokozwa wino katika mifano hiyo ni kirai nomino na sehemu iliyobaki ni kirai kitenzi. Hata hivyo, vishazi hivyo vinatofautiana kwa sababu kimoja kina maana kamili ilhali kingine hakina maana kamili.

- (a) **Mtoto yule** amefaulu mtihani. (Kishazi hiki kina maana kamili)
- (b) **Mtoto yule** aliyefaulu mtihani. (Kishazi hiki hakina maana kamili, kinahitaji taarifa zaidi ili kukamilisha maana)

Tofauti hizo zinadhihirisha kuwa kuna aina mbili za vishazi ambazo ni kishazi huru na kishazi tegemezi. Kishazi huru hujitosheleza kimaana na husimama peke yake kama sentensi kamilifu. Kwa mfano,

- (a) Mtoto anacheza mpira.
- (b) Yule ni mtoto mtukutu.

Mifano hiyo ni vishazi huru kwa sababu kila kimoja kina maana kamili na kimesimama kama sentensi kamilifu. Kinyume na kishazi huru, kishazi tegemezi hakijitoshelezi kimaana, hivyo hakiwezi kusimama peke yake kama sentensi kamilifu. Kwa mfano,

- (a) **Mwalimu aliyehamla shuleni kwetu** anaishi Mpakani

(b) **Mbwa aliyebweka usiku ni wa jirani**

Sehemu iliyokozwa wino katika mifano hiyo ni vishazi tegemezi. Vishazi hivyo havijitoshelezi kimaana na haviwezi kusimama peke yake kama sentensi kamilifu. Hii ndio maana vishazi hivyo vimeambatana na maneno hayo ambayo hayajakozwa wino ili kukamilisha maana.

Shughuli ya 2.1

Chunguza kifungu cha habari kifuatacho, kisha jibu maswali yanayofuata.

Ng'ombe waliokula mahindi ya jirani wamekamatwa. Ng'ombe hao waliwatoroka wachunga wao. Baada ya kukamatwa, walipelekwa kituo cha polisi. Polisi walimueleza jirani kuwa akilipa fidia, ng'ombe wake wataachiwa. Jirani alilipa fidia na aliondoka na ng'ombe wake.


Maswali

- Katika kifungu hiki cha habari, miundo ipi ni vishazi tegemezi?
- Kwa nini miundo uliyoitaja katika swali (a) ni vishazi tegemezi?
- Katika kifungu hiki cha habari, miundo ipi ni vishazi huru?
- Kwa nini miundo uliyoitaja katika swali (c) ni vishazi huru?

Kipashio cha nne ni sentensi. Hiki ni kipashio cha juu kabisa cha kimuundo. Kimuundo, sentensi ina sehemu kuu mbili, ambazo ni kirai nomino na kirai kitenzi. Chunguza mifano ifuatayo.

- Shamba letu** lina mazao mengi; (Tungo hii ina sehemu mbili ambazo ni KN na KT. Sehemu iliyokozwa ni KN na sehemu iliyobaki ni KT)
- Watoto** wamefika mapema (Tungo hii ina sehemu mbili ambazo ni KN na KT. Sehemu iliyokozwa ni KN na sehemu iliyobaki ni KT)

Kwa kuzingatia sifa za kimuundo, kuna aina tatu za sentensi, ambazo ni sentensi sahili, sentensi changamani na sentensi ambatani.



Kielelezo Na. 2. 1: Aina za sentensi

Sentensi sahili

Shughuli ya 2.2



Tembelea maktaba ya shule yako au shule ya jirani au mtandaoni, soma matini yoyote, kisha bainisha sentensi sahili kumi (10) na uchambue miundo yake, halafu uwasilishe darasani.

Zingatia

Sentensi sahili huwa na kitenzi kikuu (T) kimoja au kitenzi kikuu na kitenzi kisaidizi (Ts), au kitenzi kishirikishi (t). Aina hii ya sentensi huitwa sahili kwa sababu ina muundo rahisi. Kwa mfano:

(a) Sentensi sahili zenye kitenzi kikuu

(i) Twiga **wanaishi** porini katika eneo lenye miti mirefu.

T

(ii) Wanakijiji **walikata** mti.

T

(iii) **Anasoma** harakaharaka.

T

(b) Sentensi sahili zenye kitenzi kisaidizi na kitenzi kikuu (Ts na T). Kwa mfano:

(i) Karatasi **zikuwa zimezagaa** kila mahali.

Ts

T

(ii) Mgeni rasmi **alikuwa anataka** kuhutubia.

Ts

T

(iii) Mwanafunzi huyu **anapaswa apongezwe**.

Ts

T

(c) Sentensi sahili zenye kitenzi kishirikishi (t). Kwa mfano:

(i) Yule **ni** mwalimu wa somo la Kiswahili kidato cha pili.

t

(ii) Huu **si** mmea wa dawa ya watoto.

t

(iii) Mwalimu **alikuwa** shuleni leo saa saba mchana.

t

Sentensi changamani

Shughuli ya 2.3



Chunguza tungo zifuatazo, kisha bainisha tungo zenye maana kamili na zile zisizo na muundo kamili. Fafanua jibu lako.

1. Sisi tutamuaga leo
2. Yaliyoondolewa kitambo
3. Tuliyoepewa na kiranja
4. Lilipata ajali
5. Hatujachukua vitambulisho
6. Kisu kilichopotea

Zingatia

Sentensi changamani ni aina ya sentensi inayoundwa na kishazi huru kimoja na kishazi tegemezi kimoja au zaidi. Pia, inaweza kuundwa na vishazi tegemezi zaidi ya viwili vinavyokamilishana. Sentensi changamani huwa na kishazi tegemezi kinachotegemea kishazi kingine ili kujikamilisha kimaana. Utegemezi huu hutokana na matumizi ya viambishi vya urejeshi, viunganishi tegemezi na viambishi vya masharti. Urejeshi huweza kuoneshwa kwa viambishi vya urejeshi. Kwa mfano:

- (i) Madarasa yaliyosafishwa yamefungwa.
- (ii) Mwanafunzi aliyeleta vitabu hivi ameondoka.
- (iii) Nashifa alipotoka mjini alivunja televisheni.
- (iv) Shamba ambalo lilipandwa miti limeungua moto

Pili, utegemezi huweza kuoneshwa kwa kutumia viunganishi tegemezi kama vile ingawa, kwa sababu, japokuwa, na kwa kuwa. Kwa mfano:

- (i) Teresi ataondoka **kwa kuwa** shule itafungwa wiki ijayo.
- (ii) Sinsia alisema haya **kwa sababu** mwalimu hakuja.
- (iii) **Japokuwa** wanampenda, hawakumsaidia tatizo lake.

Tatu, utegemezi huweza kutokana na matumizi ya viambishi vya masharti, kwa mfano, -nge-, kama, na -ki-. Kwa mfano:

- (i) Mwalimu aklingia darasani, nitakujulisha.
- (ii) **Kama** atasoma kwa bidii, atafaulu mtihani.
- (iii) Ningejua ni mkorofi, nisingemwambia.

Sentensi ambatani

Shughuli ya 2.4



Chunguza sentensi zifuatazo, kisha bainisha miundo yake.

- (a) Nimekula lakini sijashiba.
- (b) Kwa sababu hakuwa mwadilifu, yeye alifukuzwa kazi, lakini wenzake waliendelea na kazi kama kawaida.
- (c) Mbuzi aliyeibwa amepatikana ila amevunjika mguu.
- (d) Tunda lililodondoka mtini lilikuwa limeoza lakini watoto wameliokota.
- (e) Mtoto aliyefaulu mtihani ni mwanangu lakini aliyemsindikiza kupokea zawadi ni mpwa wangu.
- (f) Kaka anaosha vyombo ilhali dada anakamua ng'ombe maziwa na wadogo zangu wanacheza mpira.

Zingatia

Sentensi ambatani huundwa na sentensi mbili au zaidi kwa kutumia kiunganishi kimoja au zaidi. Pia, huweza kuunganishwa kwa alama ya nukta-mkato (;). Kuna aina tatu za miundo ya sentensi ambatani. Muundo wa kwanza ni sentensi sahili mbili au zaidi. Kwa mfano:

- (i) Nyumba imezekwa lakini inavuja.
- (ii) Walimsukuma Juma akaanguka; akavunjika mkono; na akapoteza fahamu.

Muundo wa pili ni sentensi sahili moja au zaidi na sentensi changamani moja au zaidi. Kwa mfano:

- (i) Nyumba iliyonunuliwa mwaka jana, imeanguka leo asubuhi, ila watu wote wamenusurika, lakini mwenye nyumba ametoroka.
- (ii) Walipotoka pale nyumbani tuliwaona lakini wao hawakutuona, wala hawakujua mahali tulikokwenda.

Muundo wa tatu ni wa sentensi changamani mbili au zaidi. Kwa mfano:

- (i) Ng'ombe aliyevunjika mguu amepona na mchungaji aliyekuwa anamhudumia ameondoka.
- (ii) Gari lililonunuliwa jana limeungua moto lakini watu waliokuwa ndani yake wamenusurika.

Zoezi la 2.1

1. Kwa kutumia vyanzo mbalimbali vikiwamo maktaba au mtandao, elezea tofauti mbili zilizopo kati ya sentensi changamani na sentensi ambatani.
2. Tunga sentensi mbili ambatani kwa kutumia viunganishi “au” na “lakini”.
3. Bainisha vishazi tegemezi na vishazi huru katika sentensi changamani zifuatazo:
 - (a) Anafanya mazoezi ingawa anaumwa.
 - (b) Mwanafunzi aliyefaulu mtihani amepewa zawadi kwa sababu alisoma kwa bidii.
 - (c) Mvua ikinyesha, wakulima watapanda mazao ambayo yanahitaji mvua nyingi.

Kuzungumza kwa kutumia miundo changamani ya sentensi katika miktadha mbalimbali

Shughuli ya 2.5

Chunguza mazungumzo kuhusu “Tanzania yangu, fahari yangu” kisha bainisha sentensi ambatani tano na sentensi changamani tano zilizojitokeza katika mazungumzo hayo.

Siku moja jioni, vijana watatu walikutana na kujadiliana kuhusu kuipenda nchi yao. Mazungumzo yao yalikuwa hivi:

- Zuri:** Ninapoitazama nchi yangu Tanzania, ninapata faraja kwa sababu ni nchi yenye amani na utajiri wa maliasili. Tanzania ina watu wenye upendo wanaoishi kwa umoja na kwa mshikamano. Pia, ina mambo mengine mengi ambayo tunajivunia.
- Taji:** Hilo ni kweli, Zuri. Tanzania si tu ina vivutio vya utalii kama milima na mbuga za wanyama, bali ina historia ya ukombozi wa nchi zingine. Mambo haya ndio hutufanya tujivunie nchi yetu.
- Kito:** Hata hivyo, tunakabiliwa na changamoto kama mabadiliko ya tabianchi, mmomonyoko wa maadili, na uharibifu wa mazingira. Changamoto hizi zinapaswa kutatuliwa ili kuhakikisha kuwa nchi yetu inatunza rasilimali na amali zake, na inaendelea kustawi.

- Zuri:** Inabidi kila mmoja wetu awajibike ipasavyo katika kuyalinda na kuyatunza mazingira kama vile vyanzo vya maji. Vilevile, inatupasa kufanya kazi kwa bidii ili kuleta maendeleo katika nchi yetu, kwani wahenga walisema "Jawabu la kesho huandaliwa leo".
- Taji:** Sawa kabisa! Sambamba na hilo, ikiwa sisi na vijana wenzetu tutazingatia elimu tuliyoipata na kutumia maarifa tuliyonayo katika kufanya kazi kwa bidii, taifa letu litazidi kustawi. Tukitumia maarifa tunayopata katika elimu, tutatumia vizuri rasilimali za nchi na kuendeleza vivutio na thamani ya historia yake.
- Kito:** Tatizo ni kwamba baadhi ya vijana wenzetu wanakosa uzalendo kwa sababu hawajapata elimu kuhusu kuipenda nchi yao.
- Zuri:** Hata mimi ninaona ukweli kuhusu hilo. Hali hii inaonesha kuwa wazazi, walimu, na viongozi katika jamii wanapaswa kuhimiza uzalendo kwa vijana. Vijana wengi wanatukuza utamaduni wa kigeni na kusahau thamani ya nchi yao. Watanzania wote tunapaswa kuithamini nchi yetu ambayo Mungu ametujalia.
- Taji:** Kweli kabisa! Kwa mfano, mimi na majirani zangu tumeamua kuyatunza mazingira kwa kuyaweka safi na kupanda miti. Nchi yetu itaendelea kuwa na mandhari nzuri na yenye kuyutia sana.



- Kito:** Ndugu zangu, katika kuithamini nchi yetu, tunapaswa pia kuunga mkono juhudi za uzalishaji wa bidhaa zinazozalishwa nchini badala ya kutegemea bidhaa zinazotoka nje ya nchi. Hatua hii itasaidia sana katika kukuza uchumi wa nchi yetu.

Zuri: Umenena vyema Kito. Hakika kidole kimoja hakivunji chawa. Tunapaswa kushirikiana sote katika kuinua uchumi wa nchi yetu ili kuhakikisha kuwa tunajitegemea badala ya kutegemea misaada kutoka mataifa mengine.

Taji: Anhaa! Pia, kuna umuhimu wa kudumisha mshikamano wa kitaifa. Kwa kuwa Tanzania ina makabila mengi, tunapaswa kuungana katika kuleta umoja na uwajibikaji.

Kito: Si hivyo tu Taji. Tanzania pia imebarikiwa kuwa na lugha ya Kiswahili, ambayo inatuunganisha sote kama taifa moja bila kujali tofauti zetu za kikabila.

Zuri: Hakika Tanzania ina mengi ya kujivunia. Hii inamaanisha kuwa tunapaswa kujivunia Kiswahili kwa kukitumia kwa ufasaha badala ya kutumia lugha za kigeni zinazoweza kudhoofisha mawasiliano baina yetu na kuathiri utamaduni wetu.

Taji: Kweli kabisa! Vilevile, sisi sote tunapaswa kushiriki katika shughuli za kijamii na kiuchumi kama vile usafi wa mazingira, ulipaji wa kodi, kampeni za kupinga rushwa, na ulinzi wa rasilimali za taifa.

Kito: Naam! Kama kila mmoja wetu atawajibika kwa ajili ya taifa letu, maendeleo yatapatikana kwa haraka na kila mmoja atanufaika na rasilimali tulizo nazo.

Taji: Hivyo, uzalendo si tu kusema "Ninaipenda nchi yangu", bali ni kuonesha upendo huo kwa vitendo ikiwa pamoja na kutunza tunu za taifa letu, utamaduni wetu, na kuheshimu sheria za nchi yetu.

Kito: Pia, tunapaswa kuthamini kazi za mashujaa wetu waliopigania uhuru wa Tanzania kwa kuenzi umoja na kuepuka mfarakano katika nchi yetu.

Zuri: Tukishirikiana na kufanya kazi kwa bidii, tutaifanya Tanzania kuwa mahali pazuri kwa kizazi cha sasa na vizazi vijavyo.

Taji: Sisi sote tunapaswa kuipenda nchi yetu kwa moyo wote kwa sababu hakuna nchi nyingine duniani inayoweza kuwa nyumbani kwetu kama Tanzania!

Zingatia

Mazungumzo yenye miundo changamani hujumuisha sentensi changamani na ambatani. Sentensi changamani huwa na vipashio changamani ikiwa pamoja na urejeshi. Sentensi ambatani huundwa na vishazi viwili au zaidi, ambavyo huunganishwa kwa viunganishi kama vile **na, pia, ila, lakini, wala, halafu** na **ama**. Aghalabu, mazungumzo yenye miundo changamani huwa na sentensi ndefu zenye vishazi vinavyounganisha mawazo mbalimbali katika sentensi moja.

Shughuli ya 2.6

Chagua mada mojawapo kati ya hizi zifuatazo, kisha andaa na ufanye mdahalo kwa kutumia miundo changamani ya sentensi.

- Uwekezaji ni bora kuliko kuweka akiba.
- Muungano wa Tanzania Bara na Zanzibar ni kielelezo bora cha mshikamano.

Zoezi la 2.2

- Orodhesha viunganishi vitano, kisha tunga sentensi ambatani kwa kila kiunganishi.
- Kwa nini miundo changamani ya sentensi ni muhimu katika mawasiliano?
- Chunguza sentensi zifuatazo, kisha ainisha vishazi vilivyojitokeza.
 - Ingawa alikuwa mgonjwa, alienda shuleni kwa sababu alikuwa na mitihani.
 - Ukifanya bidii katika kazi, utafanikiwa katika maisha.
 - Nitasafiri leo kama nitapata basi.
- Tunga sentensi changamani tatu zenye vishazi tegemezi zaidi ya kimoja.

Shughuli ya 2.7

Tumia miundo changamani kuandaa mazungumzo kuhusu umuhimu wa utunzaji wa vyanzo vya maji. Kwa kushirikiana na wanafunzi wenzako, igiteni mazungumzo hayo.

Kuandika matini fupi kwa kutumia miundo changamani



Soma matini ifuatayo, kisha jibu maswali yanayofuata.

Maisha ni mwanafunzi wa kidato cha pili katika Shule ya Sekondari Maua. Yeye ni miongoni mwa wanafunzi wenye tabia njema na wanaofanya vizuri katika masomo yao. Iwapo ataendelea kusoma kwa bidii, atafaulu vizuri mitihani yake ya kidato cha pili. Maisha anaishi mbali na shule. Angalikuwa mwanafunzi mzembe, asingalikuwa anawahi shuleni. Walimu wake wanampenda na wanajivunia kuwa na mwanafunzi mwenye nidhamu na kujituma. Shule ya Maua huwapongeza wanafunzi wanaofanya vizuri katika masomo, kazi za mikono, na michezo. Mwaka jana, Maisha alipewa zawadi kwa kuwa mchezaji bora wa mpira wa miguu. Mgeni rasmi katika michezo hiyo aliahidi kumzawadia Maisha jezi na mpira. Maisha alishangilia kwa kurukaruka.

Maswali

1. Matini uliyoisoma inahusu nini?
2. Miundo changamani hujumuisha aina zipi za sentensi?
3. Ni sentensi zipi zina miundo changamani katika matini uliyoisoma?
4. Unafikiri ni kwa nini sentensi hizo zina miundo changamani?

Shughuli ya 2.8

1. Chagua mada mojawapo kati ya hizi zifuatazo, tafuta taarifa kutoka katika vyanzo mbalimbali vya maarifa kuhusu mada hiyo, kisha andika kifungu cha habari kwa kutumia miundo changamani ya sentensi.
 - (a) Athari za mitandao ya kijamii kwa vijana
 - (b) Umuhimu wa michezo shuleni

Zingatia

Matini ni andiko lolote linalojumuisha dayolojia, majigambo, mashairi, barua, na maandiko mengine. Matini fupi ni zile ambazo huwa na maneno machache na ujumbe ulio wazi na rahisi kueleweka. Uandishi wa matini kwa kutumia miundo changamani ya sentensi unahitaji ustadi katika kuhakikisha kwamba ujumbe uliokusudiwa unakuwa na ushikamani na mtiririko mzuri.

Zoezi la marudio

1. Chagua jibu sahihi katika maswali yafuatayo:
 - (i) Kimundo, sentensi huwa na pande mbili zilizoundwa na nini?
 - (a) Vipashio na vishazi
 - (b) Kirai nomino na kivumishi
 - (c) Kirai kitenzi na kishazi tegemezi
 - (d) Kirai nomino na kirai kitenzi
 - (e) Kishazi huru na kishazi tegemezi
 - (ii) Sehemu ya sentensi inayoundwa na kitenzi na maneno mengine, huitwaje?
 - (a) Kishazi huru
 - (b) Kirai nomino
 - (c) Kishazi tegemezi
 - (d) Vipashio vya sentensi
 - (e) Kirai kitenzi

- (iii) Zifuatazo ni sifa za sentensi isipokuwa
 (a) kuwa na kirai nomino tu
 (b) kufanikisha mawasiliano
 (c) kuwa na kirai nomino na kirai kitenzi
 (d) kuweza kuwa na taarifa kamili
 (e) kuwa na kishazi huru na kishazi tegemezi
- (iv) Aina ipi ya sentensi huundwa na sentensi mbili au zaidi ambazo huunganishwa kwa kutumia kiunganishi?
 (a) Changamani
 (b) Ambatani
 (c) Tegemezi
 (d) Shurutia
 (e) Sahili
- (v) "Pili alifurahi alipofaulu mtihamu wa Kiswahili". Umbo lipi huifanya sentensi hii kuwa changamani?
 (a) Kiambishi cha urejeshi
 (b) Kiambishi tamati
 (c) Kiunganishi tegemezi
 (d) Kiambishi cha mtendwa
 (e) Kiambishi cha mtenda

2. Oanisha maelezo ya **Safu A** na vipashio vya kimuundo katika **Safu B**, kisha andika herufi ya jibu sahihi katika sehemu uliyopewa.

Safu A	Safu B
i. Kifungu cha maneno ambacho neno lake kuu ni nomino _____	A. kishazi huru
ii. Neno linalotoa taarifa ya kitendo katika sentensi _____	B. kishazi tegemezi
iii. Huundwa na vitenzi vyenye urejeshi _____	C. kirai kivumishi
iv. "Atarudi kesho" ni muundo wa _____	D. kitenzi
v. "Mwanafunzi ambaye hakufika jana, asimame" ni mfano wa sentensi _____	E. kirai nomino
	F. ambatani
	G. changamani

3. Bainisha vishazi tegemezi katika tungo zifuatazo kwa kupigia mstari:
 - (i) Mwanafunzi wetu aliyepewa zawadi ameondoka.
 - (ii) Mbuzi aliyenunuliwa jana asubuhi amechinjwa.
 - (iii) Mzee aliyemkimbiza kondoo wake amerudi leo.
 - (iv) Uwanja uliojengwa Lindi umekamilika.
 - (v) Katapila lililobomoa nyumba yetu limeharibika.
 - (vi) Mkulima ambaye alifika hapa jana ni mchapakazi.
 - (vii) Pesa zilizopotea zimepatikana.
 - (viii) Msichana ambaye alituambia jana jioni atakuja kesho.
 - (ix) Kiti kilichovunjika kimetengenezwa.
 - (x) Inashangaza sana jinsi alivyotoroka jela.
4. Tofautisha kirai na kishazi.
5. Tunga sentensi tano (5), kisha bainisha vishazi katika sentensi hizo.
6. Fafanua muundo wa kirai nomino.
7. Fafanua kwa mifano tofauti zilizopo kati ya KN na KT.
8. Fafanua muundo wa sentensi sahili.
9. Andika kifungu cha habari kinachohusu ndoto yako kwa kutumia miundo changamani ya sentensi.

Utangulizi

Kusikiliza ni moja ya stadi ya msingi katika mawasiliano inayohusisha kupokea, kuelewa, na kufasili ujumbe unaotolewa na mzungumzaji. Katika sura hii, utajifunza kusikiliza mazungumzo changamani kwa umakini na udadisi. Pia, utajifunza kusikiliza mijadala, habari changamani na kuwasilisha mawazo makuu uliyoyapata kwa kuzingatia uwazi na uwekevu. Umahiri utakaoujenga utakuwezesha kupokea na kuelewa kwa usahihi taarifa pamoja na kuwasiliana kwa kujenga hoja zenye ushawishi.

Fikiri



Namna unavyoweza kusikiliza mambo mbalimbali


Kusikiliza mazungumzo changamani kwa umakini na udadisi



Wasikilize wenzako wanaposoma dayolojia hii, kisha jibu maswali yanayofuata:

- Machaka:** Habari za toka jana Mamuria?
Mamuria: Nzuri Machaka! Unaendeleaje wewe?
Machaka: Ninaendelea vizuri. Leo nina habari njema ninayotaka kukusimulia.
Mamuria: Enhee! Habari hiyo inahusu nini? Ngoja nikae kitako nikusikilize.
Machaka: Jana alikuja binamu yangu aitwaye Amina. Yeye anasoma kidato cha nne katika Shule ya Sekondari Wete iliyopo Zanzibar. Alinisimulia kuhusu zao la mwani linalolimwa baharini.
Mamuria: Mwani? Kwani bahari ina ardhi ya kuoteshea mazao ya kilimo?
Machaka: Hapana! Amina aliniambia kuwa zao la mwani hulimwa baharini. Mwani una nyuzinyuzi kama tambu.

- Mamuria:** Weee! Ni tamu kama tambi?
- Machaka:** Hapana! Bado sijauonja. Hivyo, sijui ladha yake.
- Mamuria:** Kwa hiyo, hata katika bahari iliyopo Dar es Salaam tunaweza kulima mwani?
- Machaka:** Ndiyo! Ameniambia unaota baharini tu. Amenieleza kuwa mmea wa mwani ni muhimu sana kwa afya ya binadamu na huwapatia watu kipato.
- Mamuria:** Afya? Kwa hiyo mwani ni dawa ya binadamu?
- Machaka:** Ndiyo! Mwani una virutubisho na faida nyingi kwa binadamu. Ni chanzo kikubwa cha protini na madini mengi kama vile madini-joto na madini-chuma. Madini hayo yanayopatikana katika mwani husaidia mwili kujikinga na maradhi mbalimbali.
- Mamuria:** Aisee! Hii ni taarifa nzuri sana Machaka. Ama kweli nimesadiki usemi usemao "Usilolijua ni kama usiku wa giza". Zao la mwani lina faida gani zingine?
- Machaka:** Ndiyo Mamuria! Amina alinieleza faida nyingi sana. Mwani ni chanzo cha vitamini A na C, ambazo ni muhimu kwa kinga ya mwili na afya ya ngozi. Pia, hutumika kutengenezea sabuni ambazo hutibu magonjwa ya ngozi kwa watoto na watu wazima. Aidha, hufanya ngozi kuwa nyororo na kuondoa harufu ya jekejeke. Vilevile, mwani hutumika kama mbolea ya asili ambayo hutokana na mabaki baada ya kuvunwa.
- Mamuria:** Loo! Sikuwahi kusikia kuhusu mwani. Je, amekuja na huo mmea nami nije niuone?
- Machaka:** Hapana! Amekuja na unga wa mmea huo, ambao amesema tunaweza kuutumia kwa kuweka kwenye maji ya moto, uji au maziwa.
- Mamuria:** Je, kuna madhara yoyote kwa viumbe waishio baharini ambayo hutokana na upandaji wa mwani kwa wingi?
- Machaka:** Hapana! Mwani hauna madhara yoyote kwa viumbe waishio baharini, bali unaweza kuathiriwa na kemikali pamoja na taka zinazomwagwa baharini. Kemikali na taka hizo hupunguza ubora wa mwani. Hivyo, ni muhimu kuepuka uharibifu wa mazingira ya baharini.
- Mamuria:** Loo! Kwa faida ulizonieleza kuhusu zao la mwani, ni muhimu kuhakikisha kuwa bahari yetu inalindwa kwa kuzuia uchafuzi wa bahari. Hatua hii itakifanya kilimo cha mwani kuwa salama kwani kinasaidia kuboresha afya zetu na kuongeza kipato kwa wananchi na taifa.
- Machaka:** Umenena vyema Mamuria. Sasa tumeelewa kwa pamoja kuhusu zao hili la mwani na faida zake.
- Mamuria:** Asante sana rafiki yangu kwa kunisimulia habari nzuri iliyoniongezea maarifa!



Maswali

1. Dayolojia uliyoisikiliza inahusu nini?
2. Mwani una faida gani kwa binadamu?
3. Madini gani yanapatikana katika mwani?
4. Kwa nini Mamuria alimshukuru Machaka?
5. Kutokana na masimulizi kati ya Machaka na Mamuria, umejifunza nini kuhusu zao la mwani?

Shughuli ya 3.1



Sikiliza matini iliyorekodiwa itakayoletwa na mwalimu darasani, kisha fanya yafuatayo:

- Pendekeza kichwa cha habari cha matini uliyoisikiliza.
- Fupisha matini uliyoisikiliza kwa maneno yasiyozidi 50.

Zingatia

Msikilizaji wa habari anapaswa asikilize kwa makini ili aelewe na abaini mawazo makuu. Aidha, anapaswa kubaini iwapo mambo muhimu yaliyomo katika habari hiyo yanaendana na mada husika. Ili afanikiwe kuyatekeleza haya, msikilizaji anapaswa kuyaelewa mazungumzo.

Vilevile, ili msikilizaji abaini mawazo makuu yaliyojitokeza katika habari, anapaswa asikilize kwa udadisi. Pia, anatakiwa azingatie mada na hoja muhimu zinazotolewa. Kipimo kizuri cha kubaini iwapo msikilizaji amesikiliza kwa umakini na kwa udadisi ni uwezo wa kuuliza na kujibu maswali kwa usahihi na kwa ufasaha. Sanjari na hayo, msikilizaji makini anapaswa kuwa na uwezo wa kufupisha mazungumzo kwa kuzingatia hoja muhimu.

Shughuli ya 3.2



Sikiliza kifungu cha habari kifuatacho kikisomwa na mwenzako, kisha jibu maswali yanayofuata.

Nchi ya Rahatele

Katika nchi ya Rahatele, waliishi wananchi wachapakazi na wasikivu. Wananchi hao walitii kila jambo jema waliloambiwa na viongozi wao. Walifanya kazi kwa maslahi mapana ya nchi yao. Kila agizo lililotolewa na Mfalme lilisikilizwa na kutekelezwa ipasavyo. Mfalme aliyetwa Bwana Faraji alifurahishwa sana na tabia hiyo.

Siku ziliyoyoma kama maji yatiririkavyo mtoni. Polepole, wananchi wa Rahatele walikengeuka na kuacha tabia yao ya utii. Waliacha kufanya kazi kwa bidii na badala yake waliendekeza uvivu na ulevi uliopindukia. Wananchi kutoka nchi za jirani waliwashauri lakini hawakuwasikiliza hata kidogo. Kwa kuwa sikio la kufa halisikii dawa, wananchi wa Rahatele wakaendeleza uvivu na ulevi uliopindukia.

Uchumi wa nchi ya Rahatele ulianza kuyumba na hatimaye uliporomoka kabisa kama barafu iyeyukavyo mlimani. Mfalme aliamua kuwaita wananchi wake tena na kuwaagiza kufanya kazi kwa bidii na kuacha uvivu na ulevi. Mfalme aliamini kuwa kufanya kosa si kosa bali kurudia kosa. Wananchi hawakumsikiliza Mfalme wao na badala yake waliendelea kushupaza shingo zao. Mfalme alikasirika sana na aliwaamuru askari wake wawakamate watu wote ambao walikaidi agizo lake. Wakaidi wote walikamatwa na kufungwa jela. Hata hivyo, wananchi waliobaki uraiani waliendeleza tabia yao ya ulevi wa kupindukia na kutofanya kazi.

Hali hiyo iliendelea kwa muda mrefu kidogo hadi akiba ya chakula iliyokuwapo nchini ikaisha. Salalee! Njaa kali ikatokea. Wananchi walianza kumsaka Mfalme wao na kutangatanga huku na kule ili wapate msaada wa chakula. Walilia na kusaga meno wakiyakumbuka maneno ya Mfalme, kwani njaa iliwakamata na kuwatafuna. Njaa iliwanyoosha na walidhoofu mithili ya milingoti. Mfalme alipowaona alisikitika sana. Walimuomba msamaha na kumuangukia miguuni mwake huku kila mmoja akizungumza maneno yake.

Mfalme aliwaonea huruma wananchi wake. Aliamua kuwasamehe na kuwakumbusha kuwa asiyesikia la mkuu huvunjika guu. Aliwanunulia chakula kutoka nchi za jirani na kuwagawia. Aliwakumbusha tena umuhimu wa kufanya kazi kwa bidii na kuacha uvivu na ulevi wa kupindukia.

Baada ya hapo, wananchi wa Rahatele walianza kubadilika. Walianza kufanya kazi za mashambani kwa bidii. Walilima na kuvuna mavuno mengi ya mazao mbalimbali ya chakula na biashara. Uchumi wa mwananchi mmojammoja na wa nchi kwa ujumla uliimarika na kukua tena. Walianza kuishi tena maisha ya raha. Hawakutaka kurudia tabia za uvivu na ulevi wa kupindukia. Waliyasahau yaliyopita na kuganga yajayo huku wakizidi kufanya kazi kwa bidii na kuujenga tena uchumi wa nchi yao.

Maswali

1. Sababu zipi zilichangia kushuka kwa uchumi wa nchi ya Rahatele?
2. Ni kwa namna gani Mfalme aliwapenda wananchi wake?
3. Mambo gani yaliwasaidia wananchi wa Rahatele kupata mavuno mengi?
4. Unafikiri kwa nini wananchi wa Rahatele walikuwa wavivu?
5. Ni kwa namna gani tabia za wananchi wa Rahatele zinafanana au zinatofautiana na tabia za jamii yako?
6. Ungekuwa wewe ni Mfalme wa Nchi ya Rahatele ungewafanya nini wananchi wako wasiopenda kufanya kazi?
7. Umejifunza nini kutokana na kifungu cha habari ulichokisikiliza?
8. Fupisha kifungu cha habari ulichokisikiliza kuhusu nchi ya Rahatele kwa maneno yasiyozidi 100.

Shughuli ya 3.3



Msikilize mgombea wa nafasi ya kiranja mkuu katika shule yako. Nukuu hoja zake za msingi na andika maswali ya kumuuliza baada ya kumaliza kujinadi.

Kusikiliza mijadala changamani na kuwasilisha mawazo makuu



Sikiliza kwa umakini ngonjera hii inayotambwa, kisha jibu maswali yanayofuata.

Mandawa: *Hodi hodi uwanjani, mtambaji naingia,
Nilonge yalo moyoni, ukweli kuwapatia,
Wakubwa shikamooni, heshima nawapatia,
Wanyama pori tulinde, ujangili tokomeza.*

Manenge: *Wewe wavuruga moyo, wachanganya akilini,
Mimi niwakonge nyoyo, myaweke akilini,
Binadamu ndio moyo, wanyama acha porini,
Wanyama pori si kitu, ni bora waangamie.*

Mandawa: *Wanyamapori hazina, tunu yetu kuwatunza,
Kipingamizi hakuna, kwa wanyama kuwekeza,
Faida nyingi kuona, kipato kukiongeza,
Wanyama pori tulinde, ujangili tokomeza.*

Manenge: *Usevalo sijaona, wanyama pori ni nini?
Faida zake hakuna, tuwalinde wao nani?
Hasara nyingi twaona, tusifichue kwa nini?
Wanyama pori si kitu, ni bora waangamie.*

Mandawa: *Vivutio vya nchini, hupendeza yetu macho,
Majirani watamani, kupata tulichonacho,
Tutilie maanani, kwa wanyama tuwe macho,
Wanyama pori tulinde, ujangili tokomeza.*

- Manenge:** *Tija zipi wasemea, hasara wasababisha,
Vifo vingi hutokea, poteza watu maisha,
Chui, simba kitokea, watu rehani maisha,
Wanyama pori si kitu, ni bora waangamie.*
- Mandawa:** *Wanyama ni watulivu, binadamu majangili,
Huwaua kiuovu, tena kwa njia katili,
Huendeleza uovu, kwa yetu rasilimali,
Wanyama pori tulinde, ujangili tokomeza.*
- Manenge:** *Usalama kutoweka, wanyama pori hatari,
Kifaru, tembo kumbuka, ni wanyama wa hatari,
Matatani kujiweka, kwa hawa wanyama pori,
Wanyama pori si kitu, ni bora waangamie.*
- Mandawa:** *Wanyama wana thamani, kutunzwa letu jukumu,
Watalii kuvutani, fedha kigeni muhimu,
Mapato kuongezeni, kwa uchumi wa kudumu,
Wanyama pori tulinde, ujangili tokomeza*
- Manenge:** *Sasa ndugu nakubali, wanyama pori kulinda,
Thamani yao ya kweli, yafaa sote kulinda,
Tutaneemeka kweli, ikiwa tutawalinda,
Wanyama pori tulinde, ujangili tokomeza.*
- Mandawa:** *Ngorongoro, Serengeti, twajivunia nchini,
Ujangili kiberiti, kwa wanyama hifadhini,
Tunu hii madhubuti, kwa pamoja tulindeni,
Wanyama pori tulinde, ujangili tokomeza.*
- Wote:** *Tamati tumefikia, pumziko kituoni,
Yote tuliyowambia, tahadhari chukueni,
Majangili twawambia, ujangili uacheni,
Tuwalindeni wanyama, kwa maisha endelevu*

Maswali

1. Ngonjera uliyoisikiliza inahusu nini?
2. Kwa namna gani wanyamapori wanachangia uchumi wa nchi?
3. Madhara gani yanaweza kutokea endapo mtu atawaua wanyamapori?
4. Kwa nini Manenge alipinga kuwapo kwa wanyamapori?
5. Wazo kuu la ngonjera uliyoisikiliza ni lipi?

Shughuli ya 3.4

Shiriki mdahalo na wenzako kuhusu mada ya “umuhimu wa teknolojia katika kurahisisha mawasiliano”, kisha andika mawazo makuu uliyoyasikiliza katika mdahalo huo.

Kusikiliza habari changamani na kuwasilisha mawazo makuu

Sikiliza kifungu cha habari kikisomwa na mwenzako, kisha jibu maswali yanayofuata.

Nderio aliishi na shangazi yake aitwaye Makusaro katika Kijiji cha Sembeti. Shangazi yake alikuwa mfanyabiashara aliyekuwa na kiwanda kidogo cha kushona mabegi na mikoba. Alikuwa anasoma kidato cha pili katika Shule ya Sekondari Pichini. Nderio alikuwa mchapakazi sana. Kila siku jioni baada ya kutoka shuleni, Nderio alishirikiana na shangazi yake kutengeneza mabegi na mikoba. Siku moja Nderio alimuomba shangazi yake amsimulie sababu za kuanzisha kiwanda hicho kidogo cha kutengeneza mabegi na mikoba. Shangazi alimweleza kuwa mara baada ya kuhitimu kidato cha nne, baba yake aliyeitwa Masharubu alimpeleka katika chuo cha ufundi stadi kilichopo Mjini Moshi. Huko alijifunza fani ya ushoni hususani ushonaji wa mabegi na mikoba kwa kutumia ngozi na vitenge. Aliendelea kumweleza kwamba alipohitimu mafunzo yake ya ufundi, alirudi nyumbani, ambako aliamua kuanzisha kiwanda kidogo cha ushoni. Hapo ndipo safari yake ya kujiajiri ilipoanzia.



Aliendelea kumwambia kuwa baadhi ya wanafunzi wenzake aliomaliza nao sekondari hawakuendelea na elimu ya sekondari ya juu wala hawakujiunga na vyuo vya ufundi. Hivyo, baadhi yao aliwaajiri kufanya kazi za vibarua katika kiwanda chake. Alimweleza Nderio kuwa, ili kuanzisha biashara yoyote, anapaswa kuwa na nidhamu ya fedha na lazima aifanye biashara hiyo kwa moyo. Biashara yoyote lazima iwe na mipango mizuri kwani ndiyo dira kama ilivyo usukani kwa dereva yeyote mizuri anayeongoza gari lake. Hivyo, shangazi alimshauri Nderio kuwa makini katika biashara pindi amuachapo kiwandani. Alisisitiza kuwa utaratibu mzuri ukifuatwa, ni rahisi kufahamu kiasi cha fedha kinachopatikana. Kila kitu lazima kiandikwe kwenye daftari kama kumbukumbu. Haiwezekani kukumbuka mambo yote kichwani kwani mali bila daftari hupotea bila habari. Shangazi aliendelea kulisitiza kuhusu uaminifu katika biashara kwa kueleza kuwa, katika biashara, fedha hazipaswi kutumika hovyoyote.

Vilevile, alieleza kuwa ameifanya biashara hiyo kwa takribani miaka ishirini (20). Biashara hiyo ilimuwezesha kusomesha watoto wake na kujenga nyumba nzuri ya kuishi. Mabegi na mikoba aliyoitengeneza kwa kutumia ngozi na vitenge iliwavutia watalii na watu wengine wengi, jambo lililomfanya aanze kuuza bidhaa hizo karibu na lango la kupandia Mlima Kilimanjaro.

Nderio alifurahi sana na kumshukuru shangazi yake kwa kumwelezea siri ya mafanikio yake. Alimuahidi kuwa atazingatia masomo yake vizuri na kuendelea na mchepuo wake wa biashara aliouchagua kuanzia kidato cha kwanza. Aliamini kuwa masomo ya biashara yatamsaidia kuanzisha na kusimamia biashara baada ya kumaliza kidato cha nne.

Maswali

1. Habari uliyoisikiliza inahusu nini?
2. Kwa nini shangazi yake Nderio alianzisha kiwanda cha ushonaji?
3. Kutokana na habari uliyoisikiliza, ni mambo gani ya kuzingatia unapofanya biashara?
4. Kwa nini elimu ya ufundi stadi ni muhimu kwa maisha ya sasa?
5. Kifungu cha habari ulichokisikiliza kina mawazo gani makuu?

Zoezi la 3.1

1. Sikiliza kifungu cha habari changamani utakachosomewa na mwalimu, kisha andika muhtasari wake.
2. Elezea mambo ya kuzingatia unapowasilisha mawazo makuu uliyoyasikiliza katika kifungu cha habari au majadiliano.
3. Sikiliza kwa makini shairi "Kama unataka mali" litakalosomwa na mwalimu, kisha andika mawazo makuu.

Shughuli ya 3.5

Sikiliza kwa umakini taarifa ya habari kutoka kituo chochote cha redio au runinga, kisha andika kwa kifupi habari uliyoisikiliza kwa kuzingatia mawazo makuu.

Zoezi la marudio

1. Sikiliza wimbo ufuatao ukiimbwa na mwenzako, kisha jibu maswali yanayofuata.

*Acha nibaki na raha zangu,
Kwa nini nisifurahi?
Kuzaliwa Tanzania, kwa baba na mama - ni kwetu! Ni
kisiwa cha amani, moyo hautetemeki - hakika, pita
huku, nenda kule, wasiwasi haupati - ni uhuru,
Kote wendako nyumbani, iwe hata Zaramoni - umefika.*

Kiitikio: *Nihame niende wapi?
Nimefika, siondoki.
Acha nipatunze kwetu.
Hatua tumezipiga maishani,
Huoni miundombinu? Imejaa.*

*Barabara za lami na majengo teletele - mazuri,
Maji yametapakaa, nyumbani kila mahali - masafi,
Shule nyingi zapendeza, zimesheheni majengo na walimu,
Elimu mepanda juu, watu wameelimishwa - wasomi.*

- (a) Kipi kinaweza kuwa kichwa cha wimbo uliousikiliza?
 - (b) Mtunzi anaposema "kote wendako amani" anamaanisha nini?
 - (c) Yapi ni mawazo makuu ya wimbo uliousikiliza?
2. Ni mambo gani ya msingi unayopaswa kuyazingatia unapofupisha kifungu cha habari ulichokisikiliza?
 3. Ni kwa namna gani unaweza kujua kwamba msikilizaji amesikiliza kwa umakini?
 4. Kwa kutumia vyanzo mbalimbali vikiwemo vya mtandaoni, sikiliza mazungumzo kati ya mwandishi wa habari na wazazi, kisha wasilisha mawazo makuu kutokana na mazungumzo hayo.
 5. Tazama na sikiliza filamu kuhusu maadili kwa vijana kutoka chanzo chochote, kisha wasimulie wenzako mambo ya msingi uliyojifunza.

Kuwasiliana kwa ufasaha kwa njia ya mazungumzo

Utangulizi

Watu huwasiliana kwa kutumia mitindo mbalimbali ya lugha. Katika sura hii, utajifunza kuwasiliana kwa kuzungumza kwa kutumia mitindo mbalimbali ya lugha kwa kuzingatia muktadha. Vilevile, utajifunza kutumia kwa usahihi ishara zinazoambatana na mazungumzo katika kuwasiliana. Umahiri utakaoujenga utakuwezesha kuwasiliana kwa ufasaha kwa njia ya mazungumzo kulingana na muktadha husika.

Fikiri



Mitindo mbalimbali ya lugha katika mawasiliano kwa njia ya mazungumzo

Kuzungumza kwa kutumia mitindo mbalimbali ya lugha



Igiza na wenzako mazungumzo yafuatayo, kisha jibu maswali yanayofuata.

- Tiamaji:** (Anatembea akipepesuka mithili ya mtu aliyelewa.) Oyaa! Mbona mnazingua wana?
- Dongo:** Kimya mwana, usizingue! Tunatafakari tunavyopigika tu. (Anajikuna kichwani.)
- Tiamaji:** (Anamsogelea Dongo.) Mwanaume ... umepata mchongo nini? Wewe ndiwe chuma changu. Ulinipokea mjini. (Anajisogeza jirani na Dongo huku akiimba.)
- Sugaya:** (Anazinduka usingizini na kunyanyuka mtaroni huku akiwa amebeba kipande cha boksi.) Mshua unazingua ... umenipigia makelele hadi nimeamka. Nilitaka nilale zaidi ili nisahau njaa niliyolala nayo; sasa

umenitingisha. Haya, nifichie hili godoro langu manake juzi mwizi kapita. (*Ananyoosha mkono kwa Tiamaji akimpa kipande cha boksi chenye unyevu.*)

Dongo: (*Anainuka, huku akiimba na kucheza. Suruali yake imeraruliwa, mguu mmoja mrefu na mwingine mfupi.*) ... twende tukawinde, leo tukawinde vipepeo...

Tiamaji: (*Anamtotea jicho Dongo.*) Nitakuzingua. Achana na wimbo wangu mwana. Niliutunga mwenyewe tangu nikiwa bushi. (*Dongo anaendelea kuimba. Hajali.*) Mwana, hunisikii? (*Anainuka kumfuata Dongo na kumshika shati.*) Dongo anampiga ngumi mgongoni. Wanavutana kwa takribani dakika tatu na kuangushana.

Sugaya: (*Anaamka.*) Oyaa! Nyie masela vipi? Ha ha haa! (*Anacheka kwa sauti kubwa, anawasogelea na kuwaachanisha; kila mmoja akielekea mbali kidogo na mtaro wautumiao kama malazi.*)

Dongo: (*Baada ya dakika mbili, anawasogelea wenzake kama vile anataka kuwasemesha, lakini Sikitu anawahi kusema.*)

Sikitu: "Duu! Hivi sisi tumemkosea nini Muumba? Tunaishi mitaroni tangu wadogo hadi twazeeka. Leo tujitahidi walau tuambulie ukoko kwa mamalishe. Mama Wawili hana choyo. Atatugea tu.

Dongo: Au siyo! Yule ndiye mdau wetu wa misosi. Jana wajanja walituwahi tukakosa mazagazaga wakatulaza njaa. (*Anaingiza mkono mfukoni na kutoa noti ya shilingi elfu kumi akionesha kuwaringishia wenzake.*)

Sugaya: Aaah! Mshua umetoa wapi mapene yote hayo?

Dongo: Mtoto wa kitaa haulizwi maswali mepesi kama hayo. Nililala njaa na utajiri wangu.

Sugaya: Poa mwana! (*Anasimama akizungukazunguka, kisha anaongea kama vile hataki.*) Mwana, sisi wenzako tulishaacha kupiga ganja na wewe ni bora uache! Linazeesha na kuchosha akili.

Sikitu: (*Ghafla, anamwona askari polisi kwa mbali. Anawapa wenzake ushauri.*) Wanangu, tuamshe wakitukuta hapa itakuwa msala.

Tiamaji, Dongo, Sugaya, Sikitu: (*Wote wanaondoka eneo hilo kuwakimbia polisi.*)

Maswali

1. Wazungumzaji wako katika muktadha gani wa mazungumzo?
2. Mazungumzo haya ni ya watu wa rika gani?
3. Kwa nini wazungumzaji katika igizo walikimbia baada ya kuwaona askari polisi?
4. Mazungumzo uliyoyaigiza yanaweza kuwa na kichwa gani cha habari?
5. Sifa zipi za mazungumzo zimejitokeza katika mazungumzo hayo?

Zingatia

Mazungumzo hutawaliwa na mitindo mbalimbali ya lugha. Mitindo hiyo hutumika kulingana na muktadha na shughuli mahususi ya mazungumzo. Muktadha unahusisha masuala kama jinsi, umri, uhusiano wa wahusika, mada, mahali, na majira. Vipengele hivi vya muktadha ndivyo hutofautisha mitindo ya lugha. Hali hii ina maana kuwa kuna mtindo fulani mahususi wa matumizi ya lugha katika kila muktadha. Kwa ujumla, mitindo ya matumizi ya lugha hutokana na mazingira ya watumiaji wa lugha kutofautiana, kama vile kishughuli, kiuhusiano, na kiutamaduni. Kwa mfano, mitindo ya lugha inayotumika hospitalini, shuleni, mahakamani, msikitini, kanisani, shambani, ziwani, au baharini hutofautiana. Mtindo wa lugha unaotumika kulingana na shughuli na mahali mahususi hujulikana kama rejesta.

Shughuli ya 4.1

(a) Tembelea maeneo yafuatayo, kisha chunguza lugha inayotumika.

- (i) Hospitalini au zahanati
- (ii) Sokoni au gulioni

(b) Andika kwa ufupi sifa ya lugha inayotumika katika maeneo uliyotembelea.

Zoezi la 4.1

1. Andika mazungumzo mafupi yanayozingatia mtindo mahususi wa lugha wa maeneo yafuatayo:
 - (a) Kituo cha polisi
 - (b) Michezoni
 - (c) Shuleni
 - (d) Mtaani
 - (e) Kwenye nyumba za ibada
2. Kwa kutumia mifano, elezea sababu tano (5) za kujitokeza kwa mitindo anuwai ya lugha katika jamii.

Zingatia

Mitindo ya lugha hubeba dhima mbalimbali ikiwa pamoja na kuwatambulisha wazungumzaji. Mathalani, mitindo inaweza kuwatambulisha wazungumzaji kuwa ni matabibu, wavuvi, wanafunzi, wakulima, mafundi, n.k. Vilevile, mitindo hii ya lugha huweza kutumika kwa lengo la kuficha maana ya dhana au maneno yanayotumika kwa hadhira isiyotoka katika kundi au jamii inayohusika. Halikadhalika, mitindo hii ya lugha hutumika ili kurahisisha mawasiliano katika muktadha unaohusika. Kwa mfano, kutumia maneno ya mkato kuandika historia ya mgonjwa, matibabu, dawa na matumizi yake hurahisisha mawasiliano kwenye shughuli za utabibu hospitalini. Kadhalika, wazungumzaji wanaweza kuteua mtindo wa lugha ya kutumia kutokana na lengo la mazungumzo. Kwa mfano, mtu mwenye lengo la kuomba hela atatumia lugha ya upole na unyenyekevu ilhali mtu huyohuyo akiwa na lengo la kuelimisha kuhusu jambo fulani atatumia lugha ya kuonya, kusesitiza, au kushauri. Kwa upande wa umuhimu, mitindo ya lugha hutumika kukuza lugha kwa kupanua msamiati kupitia kuongeza maneno mapya hivyo kukidhi mahitaji ya kimawasiliano ya watumiaji wa mtindo wa lugha unaohusika. Aidha, mitindo husaidia kujenga uhusiano wa karibu baina ya wahusika wa mazungumzo.

Shughuli ya 4.2

Tumia vyanzo mbalimbali ili kupata mazungumzo ya hotelini, kisha chambua sifa za mazungumzo hayo.

Zoezi la 4.2

1. Chunguza mazungumzo A, B na C, kisha bainisha aina ya wazungumzaji, mada au shughuli, aina ya mazungumzo na mazingira ya wazungumzaji:

Mazungumzo A

Nocha: Oya wangu, vipi mambo?
Mwasi: Poa mwanangu! Inakuwaje?
Nocha: Baridi mshikaji! Mambo leo si shwari wangu.
Mwasi: Vipi, maji shingoni siyo! Usikonde! Kuna ishu ikienda poa basi...
Nocha: Basi taim, taim... nistue. Nipo maskani.
Mwasi: Poa!

Mazungumzo B

Nduke: Hujambo Luba?
Luba: Sijambo, shikamoo mwalimu!
Nduke: Marahaba! Kwa nini somo langu umefeli?

- Luba: Kwa sababu sikusoma kwa bidii, mwalimu.
 Nduke: Ooh! Afadhali umebaini kosa lako. Sasa unaniahidi nini?
 Luba: Ninaahidi kusoma kwa bidii ili nifaulu somo hili la Kiswahili.
 Nduke: Haya, nenda darasani ukafanye kama ulivyoahidi.
 Luba: Asante sana mwalimu!

Mazungumzo C

- Mhusika 1: Karibu!
 Mhusika 2: Asante!
 Mhusika 1: Unasumbuliwa na nini?
 Mhusika 2: Ninaumwa tumbo, kichwa, na ninajisikia kutapika.
 Mhusika 1: Hali hii imekuanza lini?
 Mhusika 2: Imenianza jana usiku.
 Mhusika 1: Sasa nenda maabara ukapime damu, choo na mkojo.
 Mhusika 2: Sawa!

2. Nini kinachotofautisha mazungumzo A, B na C?
3. Nini kitatokea endapo mitindo ya lugha haitazingatiwa katika mazungumzo?

Shughuli ya 4.3

Katika vikundi, andaa na igiza mazungumzo yanayohusu mkutano wa maendeleo ya kijiji. Katika mazungumzo hayo, zingatia mada, umri, jinsi na uhusiano wa wahusika.

Kutumia ishara katika mazungumzo



Chunguza picha zifuatazo, kisha elezea kila moja inaashiria nini.



Zingatia

Kutumia ishara katika mazungumzo ni muhimu katika mawasiliano kwa sababu huonesha hisia na kutoa ujumbe wakati wa mazungumzo. Ishara hujumuisha minyumbuliko ya uso, viarudhi na ishara zingine zinazooneshwa kupitia mijongo ya mwili wote na viungo vyake. Hata hivyo, ni muhimu kukumbuka kuwa matumizi ya ishara na maana zake katika mazungumzo huweza kutofautiana kulingana na utamaduni husika. Hivyo, kuzifasili ishara kwa usahihi kunahitaji uelewa na hisia za kitamaduni. Ishara husaidia kuonesha hisia halisi katika mazungumzo na kuimarisha uhusiano. Pia, hurahisisha mawasiliano na kufikisha ujumbe ambao usingeweza kufikishwa vizuri kwa maneno. **Jedwali la 4.1** linaonesha ishara na viashiria vyake katika mazungumzo.


Jedwali la 4. 1: Ishara na viashiria vyake

Minyumbuliko ya uso (kutabasamu, kukunja uso, kukonyeza, au kubinua midomo)	Huweza kuonesha furaha, woga, hasira, mshangao au wasiwasi.
Mijongoe ya macho	Mijongoe ya macho inaweza kuashiria hali ya kujiamini, kushawishi, uchovu, kukereka, kuhuzunika, kukataza au kukubali.
Mijongoe ya mwili au viungo vyake kama vile mikao ya mwili mzima, mijongoe ya mabega, mijongoe ya kichwa, au mijongoe ya magoti	Kupandisha mabega au kutikisa kichwa huweza kuashiria mamlaka au hadhi, kukataa au kukubali. Kupiga magoti kunaweza kuashiria unyenyekevu, heshima na adabu au kukubali.
Ishara zingine za mwili kama vile kupishanisha mikono, kurusha mikono, na mijongoe ya vidole	Huweza kuashiria kukataa, kukubali, kupinga, kuaga, kusesitiza, kupongeza au kushangilia.
Kugusa (kama vile kushikana mikono, kukumbatiana au kupiga mgongo kwa upole)	Huweza kuashiria hisia za ukarimu, huruma, msaada, kufariji, kupongeza, kusesitiza au kuita.
Viarudhi (toni ya sauti, shada, kiimbo, mkazo, au wakaa)	Huweza kuashiria hisia za hofu, mshituko, hasira, mshangao, huzuni, majonzi, furaha au ujasiri.
Kimya	Kukaa kimya kunaweza kuashiria dharau, kukubaliana, kukataa, heshima, kuogopa au kukasirika.

Shughuli ya 4.4



1. Chunguza picha zifuatazo, kisha elezea maana ya ishara zinazoonekana.



2. Igiza ishara za hali zilizoorodheshwa ndani ya kisanduku.

kasirika	furahi	nuna	
huzunika	kubali	kataa	waza

Zoezi la 4.3

1. Bainisha ishara ambazo hazijatajwa katika sura hii zinazotumika katika mazungumzo na elezea zinaashiria nini.
2. Katika ishara ulizozitaja katika swali la 1 zipi zinatumiwa zaidi katika mazungumzo ya kila siku katika jamii yako?
3. Bainisha mijongeo mbalimbali ya mwili tofauti na iliyotajwa katika sura hii ambayo hutumiwa katika mazungumzo na elezea inaashiria nini.

Shughuli ya 4.5

1. Igiza mazungumzo yafuatayo huku ukionesha ishara zinazotumika wakati wa mazungumzo.

Tatu: Shikamoo Mama Madevu! Habari za leo?

Mama Madevu: Ooh, marahaba Tatu! Mimi leo siko sawa kabisa kama ilivyo siku zingine. Asante kwa kuja! Angalau unisaidie kufanya usafi.

Tatu: Hakuna shida Mama Madevu. Ni furaha yangu kuwa na wewe leo na kukusaidia kazi. Tuanze na kazi ipi?

Mama Madevu: Vizuri sana! Tuanze kumwagilia bustani ya maua.

Tatu: Sawa! Ngoja nichukue ndoo ya kumwagilizia.

Mama Madevu: Asante sana Tatu! Wewe ni msaada mkubwa sana kwangu. Siku hizi kuna vijana wachache sana wenye tabia kama yako.

Tatu: Asante sana mama Madevu!

2. Bainisha ishara zilizotumika katika mazungumzo haya.
3. Ishara zilizotumika katika mazungumzo haya zinaashiria nini?

Zoezi la marudio

1. Chagua jibu sahihi katika maswali yafuatayo.
 - (i) Nyenzo kuu ya lugha ya mazungumzo kati ya hizi zifuatazo ni ipi?
 - (a) Usimuliaji na vitendo
 - (b) Mdomo na ishara
 - (c) Maandishi na masikio
 - (d) Vitendo na mdomo
 - (e) Ishara na vitendo
 - (ii) Dhima mojawapo ya rejesta katika matumizi ya lugha ni ipi?
 - (a) Kuzuka kwa matukio mbalimbali
 - (b) Kukuza maendeleo ya sayansi na teknolojia
 - (c) Kumudu shughuli inayofanyika
 - (d) Kukidhi haja mahususi ya mawasiliano
 - (e) Kukwamisha mawasiliano

(iii) Nini kinachoweza kutofautisha matumizi ya ishara katika mazungumzo?

- (a) Tofauti za kitamaduni
- (b) Elimu au ujuzi
- (c) Watoto na wazee
- (d) Muda wa mazungumzo
- (e) Mada ya mazungumzo

(iv) Ipi kati ya kauli zifuatazo ni mfano wa rejesta ya kidini?

- (a) Mahakama imeamua kesi hii kwa mujibu wa sheria
- (b) Waumini tuache kutenda dhambi
- (c) Hebu twende pale kijiweni tukaongee
- (d) Mzunguko wa damu katika mwili wa binadamu
- (e) Meza moja kutwa mara tatu

(v) Jambo gani linaweza kusababisha mitindo mbalimbali ya lugha?

- (a) Upekee wa kundi la watumiaji wa lugha
- (b) Msambao wa watumiaji wa lugha
- (c) Wazungumzaji kutumia lugha tofauti
- (d) Wazungumzaji kutoka katika maeneo tofauti
- (e) Kutofahamiana kwa wazungumzaji

2. Oanisha maelezo yaliyopo katika **Safu A** na dhana zilizopo katika **Safu B** kwa kuandika herufi ya jibu sahihi ili kukamilisha maana.

Safu A	Safu B
(i) Mitindo tofauti ya lugha katika miktadha mbalimbali	A. rejesta ya hospitalini
(ii) Upekee wa kundi la watu na shughuli inayofanyika	B. rejesta ya mtaani
(iii) Mkao wa mwili, mijongeo ya macho, na ukimya	C. dhima za rejesta
(iv) Kutwa mara tatu	D. rejesta ya mahakamani
(v) Mheshimiwa hakimu	E. chanzo cha rejesta
	F. ishara zinazotumika katika mazungumzo
	G. rejesta

3. Bainisha dhima za rejesta katika mazungumzo.

4. Fafanua sifa za lugha ya mazungumzo.

5. Elezea umuhimu wa kutumia ishara katika mazungumzo.

Utangulizi

Kusoma kwa ufahamu huhitaji umakini ili kuelewa mawazo au hoja zilizomo katika matini. Katika sura hii, utajifunza kusoma kitunduizi matini ndefu na changamani. Pia, utajifunza kusoma na kuandika muhtasari wa hoja kuu zilizomo katika matini na kutoa maoni kuhusu hoja hizo. Umahiri utakaoujenga utakusaidia kufasili na kuchambua hoja mbalimbali katika matini ndefu changamani na kuziandika kwa muhtasari.

Fikiri

Usomaji wa matini changamani

Kusoma kitunduizi matini ndefu changamani

Soma matini ifuatayo, kisha jibu maswali yanayofuata.

Katika Nchi ya Mapambano, aliishi mtemi ambaye alikuwa zuzu. Mtemi alijishughulisha na biashara ya kuuza mbao na nguzo za miti. Ili kupata mbao na nguzo hizo, Mtemi alikata misitu ovyo. Baada ya miaka kadhaa, nchi iligeuka jangwa na dalili za kukumbwa na majanga ya asili zilianza kuonekana waziwazi. Wananchi wake walimshauri kuchukua tahadhari dhidi ya majanga ya asili yaliyoanza kutokea katika nchi zingine lakini alipuuza.

Majira ya masika yalipofika, mvua kubwa za mfululizo zilianza kunyesha na mito ilifurika. Maji yalisambaa ovyo mjini na kufunika makazi ya wananchi pamoja na kasri la Mtemi. Askari wa Mtemi walimuokoa na kumsafirisha hadi nchi ya mbali. Baadhi ya wananchi walipoteza maisha kutokana na mafuriko hayo. Kwa hakika, mafuriko yalileta madhara makubwa kwa watu, mali zao, na mazingira kwa ujumla. Manusura wa mafuriko walimlaumu Mtemi wao kwa kutoroka nchi yake na kuwaacha katika tabu na shida.

Wananchi walianza harakati za uokozi, ikiwa ni pamoja na kufaragua zana na mitambo ya kuchimba mitaro, ili kudhibiti mafuriko. Harakati hizi zilisaidia nyumba zisiendelee kujaa maji na kubomoka. Baada ya mvua kukata, wananchi walianza kufikiria hatima ya maisha yao kwa kujiwekea mikakati madhubuti ya kupambana na majanga ya asili, ili kuokoa maisha yao. Walifikiri kwa upeo wa juu kuhusu mikakati hiyo. Hivyo, waliamua kutunga sera na miongozo kuhusu mazingira. Katika sera na miongozo hiyo, walibuni programu za kuhifadhi mazingira, na kuisitiza utashi katika kutekeleza programu hizo.

Huku wananchi wakiamini kuwa wakati wa shida umekoma, ghafla kundi la tunutu lilivamia vijiji vya mpakani na kuharibu mazao mashambani na mimea mbalimbali iliyokuwa juu ya uso wa nchi. Mwananchi mmoja alihamasisha mshikamano miongoni mwao katika kipindi hicho na kuwatia moyo kuwa watavuka salama. Aliwadadavulia wenzake kuwa njia ya kuangamiza tunutu hao ni kuwanyunyuzia sumu. Huku wakiendelea na jitihada za kupambana na tunutu, mvua iliacha kunyesha kabisa kwa muda wa miaka miwili. Ukame ulizidi; mimea ilidhoofu na kufa; na mifugo nayo ilianza kufa kwa kukosa malisho na maji. Taharuki na buka ilianza kutanda katika Nchi ya Mapambano. Kilio cha kila mwananchi kilikuwa maji! Maji! Maji! Akiwa ughaibuni, Mtemi aliwaandikia wananchi wake waraka akiwaomba radhi kwa yale yaliyotokea, na kuwasihia kuwa wavumilivu katika kupambana na majanga ya asili.

Mtemi mmoja katika nchi jirani iliyoitwa Hema alisikia kilio chao. Alimtuma mhandisi wake kwenda Nchi ya Mapambano kwa ajili ya kufanya upembuzi yakinifu ili kuwachimbua visima. Mhandisi alipofika katika Nchi ya Mapambano, alifanya ufedhuli na kujigamba kwa wananchi badala ya kutekeleza wajibu wake. Taarifa hizi zilimfikia Mtemi wa Hema, hivyo aliamuru mhandisi huyo arudishwe haraka nchini kwake ili akachukuliwe hatua za kinidhamu.

Wananchi walijizatiti kwa pamoja kupambana na majanga ya asili. Walianzisha mkakati mwingine wa kuchimba visima nchi nzima. Walitumia rasilimali na mitambo yao waliyofaragua. Hatimaye walifanikiwa kupata maji ya kutosha. Walitumia maji hayo katika kilimo cha umwagiliaji na kupata mazao mengi. Waliuza sehemu ya mazao hayo na kupata mabunda ya fedha. Walijenga shule za kisasa na kuanzisha miradi ya utunzaji wa mazingira shuleni na majumbani. Nchi ya Mapambano ilipata maendeleo kwa kasi. Waliachana na utegemezi wa misaada kutoka nchi zingine. Walijifunza kuzingatia taarifa za hali ya hewa na kuchukua tahadhari.

Baada ya kusikia mafanikio katika nchi yake, Mtemi aliyetorokea ughaibuni aliamua kurudi nchini kwake. Alipofika alikamatwa na kufikishwa katika baraza la kimila ili ajieleze. Hatimaye viongozi wa kimila waliamuru kesi ipelekwe mahakamani. Mtemi alishitakiwa kwa kosa la usaliti na alihukumiwa kifungo cha miaka mitano jela. Kwa hakika, kukimbia matatizo si njia ya utatuzi.

Maswali

1. Mtemi wa Nchi ya Mapambano alikuwa na tabia gani?
2. Nchi ya Mapambano ilikumbwa na majanga gani?
3. Wananchi wa Nchi ya Mapambano walijiwekea mikakati gani kupambana na majanga ya asili?
4. Mtemi wa Nchi ya Mapambano aliporejea nchini kwake alifanywa nini?
5. Kwa nini Mtemi wa Nchi ya Hema aliamuru mhandisi arudishwe nchini kwake?
6. Ungekuwa mtemi wa Nchi ya Mapambano ungefanya nini ili kuinusuru nchi dhidi ya majanga ya asili?
7. Umejifunza nini kutokana na matini uliyoisoma?

Zingatia

Matini ndefu changamani huwa na maudhui mchanganyiko na hutumia istilahi mbalimbali za nyanja maalumu kama vile sayansi, teknolojia, biashara, sheria, uchumi, siasa, elimu n.k. Kusoma matini husaidia kupata uelewa kuhusu jambo lililoandikwa. Ufahamu wa kusoma ni uelewa wa jambo fulani anaoupata mtu kutokana na kusoma matini mbalimbali kama vile kifungu cha habari, makala, kitabu au gazeti. Msomaji anapaswa kubainisha mawazo makuu yanayotokana na matini aliyoisoma. Msomaji anaweza kuelewa jambo kupitia kusoma kwa sauti au kimya. Anaposoma kwa sauti au kimya, msomaji huzingatia matamshi sahihi ya maneno kama vile mkazo katika utamkaji wa silabi, kiimbo na lafudhi ili kupata maana sahihi. Pia, huzingatia alama za uakifishaji na mtiririko wa mawazo katika aya.

Msomaji anapaswa kuelewa mawazo kuhusiana na jambo linalozungumzwa na mwandishi kwa kujiuliza maswali wakati anasoma matini.

Shughuli ya 5.1

Fupisha matini uliyoisoma katika ukurasa wa 54-55 kwa maneno kati ya 60-80 kwa kuzingatia hoja kuu zilizomo, kisha isome kwa sauti mbele ya wanafunzi wenzako.

Zoezi la 5.1

1. Unaelewa nini kuhusu matini ndefu changamani?
2. Fafanua umuhimu wa kusoma matini ndefu changamani.
3. Elezea mambo anayopaswa kuzingatia msomaji anaposoma matini kwa sauti.
4. Ili msomaji aelee matini ndefu changamani na kujibu maswali ipasavyo, anapaswa kufanya nini?

Shughuli ya 5.2

Chunguza shairi lifuatalo, kisha jibu maswali yanayofuata.

1. Kiswahili lugha safi, lugha iso na mzozo,
Imetoka kwenye ghafi, imeshika muongozo,
Ni tajiri kwa sarufi, na stadi zifunzazo,
Hakika ndiyo johari, lugha yetu Kiswahili.
2. Lugha yetu ina nguvu, hakika twajivunia,
Tena ni lugha angavu, elimu kufundishia,
Inatupa ushupavu, sote tunaisifia,
Ni amali na johari, lugha yetu Kiswahili.
3. Kiswahili kina nuru, kimetutoa gizani,
Tukaupata uhuru, umoja nayo amani,
Wachache wanakufuru, wageni wakitamani,
Ni amali na johari, lugha yetu Kiswahili.
4. Yatupasa kushukuru, kimeondoa mizozo,
Kimetwangazia nuru, hakuna mnyong'onyezo,
Tukaupata uhuru, na furaha mzomzo,
Ni amali na johari, lugha yetu Kiswahili.
5. Lugha hii ina nguvu, tuipe msisitizo,
Tena ni lugha shupavu, ipewe muendelezo,
Imejaa uangavu, uliojaa uwezo,
Ni amali na johari, lugha yetu Kiswahili.
6. Ni lugha yenye ushindi, Tanzania yetu nguzo,
Imetawala makundi, japo wapo wenye bezo,
Ila wengi walo ndani, na wa nje ni tukuzo,
Ni amali na johari, lugha yetu Kiswahili.

7. *Leo sisi ni taifa, twajuliwa pande hizo,
Kiswahili kimasafa, ki mbele ya zinginezo,
Chadumisha yetu sifa, na shufaa tuko nazo,
Ni amali na johari, lugha yetu Kiswahili.*

8. *Hapa natia komeo, ishara ya kibwagizo,
Ni alama ya kituo, mwisho wa muendelezo,
Nashika fumo na ngao, nimeziimba sifazo,
Ni amali na johari, lugha yetu Kiswahili.*

Chanzo: Nuru (1975:57 - 58), limeboreshwa na TET.

Maswali

1. Shairi ulilolisoma linahusu nini?
2. Ni faida zipi za lugha ya Kiswahili zinazoelezwa na mshairi?
3. Mshairi anamaanisha nini anaposema "Kiswahili ni amali na johari"?
4. Ni jambo gani linatuunganisha Watanzania kama taifa na kututambulisha ulimwenguni kote?
5. Ni mawazo gani makuu yaliyojitokeza katika shairi ulilolisoma? Eleza kwa aya moja.

Kuandika muhtasari wa hoja kuu na kutoa maoni



Soma matini ifuatayo, kisha jibu maswali yanayofuata.

- Nufaida:** Hodi! (*Pazia linafunguliwa. Nufaida anaonekana akigonga mlango kwenye nyumba ya Ngineo kubisha hodi.*)
- Mafito:** Karibu! (*Anaitikia kwa haraka.*)
- Nufaida:** Mama Anna yupo?
- Mafito:** Ndiyo! (*Anaita.*) Ngineo.
- Ngineo:** Abee! Baba Anna, unasemaje? (*Anaitika kutoka uani.*)
- Mafito:** Kuna mgeni.
- Ngineo:** Nani?
- Mafito:** Njoo umwone!
- Ngineo:** Sawa! (*Anatoka uani kuja kumwona mgeni. Anamuona Nufaida.*)
Anamsabahi. Habari za leo shoga yangu?
- Nufaida:** Nzuri! Unafanya nini shoga yangu?

- Ngineo:** Ninasimamia kazi ya kufua nguo. Nina dada wa kazi mdogo. Huwa ninamsimamia anapofanya kazi. Yupo uani anafua rundo kubwa la nguo. Akimaliza, atadeki nyumba.
- Nufaida:** Mh, mbona kazi nyingi! Unamlipa shilingi ngapi?
- Ngineo:** Simlipi chochote; ujira wake ni kula na kulala tu.
- Nufaida:** Ninaweza kwenda kumwona?
- Ngineo:** Unaweza shoga yangu. (*Wote wanaelekea uani ambako Kabala anafanya kazi.*) Ndiye huyu.
- Kabala:** Shikamoo! (*Anamsalimia Nufaida huku akiendelea na kazi ya kufua nguo.*)
- Nufaida:** Marahaba! (*Anaitikia salamu kwa unyonge na kumwonea huruma. Anamwambia Nginco warudi ndani. Wanarudi ndani ya nyumba.*)
- Ngineo:** Umemwona dada wa kazi?
- Nufaida:** Ndiyo! Mbona ni binti mdogo sana? Anasoma?
- Ngineo:** Hasomi. Asume tena! Kazi atamwachia nani?
- Nufaida:** Lo! Huoni kwamba unamtumikisha mtoto? Serikali imekataza ajira kwa watoto. Shoga yangu, angelikuwa mwanao ungelimfanyia hivi? Acha kumtumikisha mtoto. Huyu mtoto alitakiwa awe shuleni. Utaingia kwenye mikono ya serikali.
- Ngineo:** Kwa hiyo mimi niache ujasiriamali wangu kisa huyu? Siachi hata kidogo. Ngoja achape kazi mpaka akome!
- Nufaida:** Ninakwenda polisi kutoa taarifa. Itakula kwako ujue! Hakuna ushoga mbele ya ufedhuli huu.
- Ngineo:** Utajiju! Eti unakwenda polisi! Nenda! Unamtisha nani? Eti itakula kwangu! Ha! Ha! Ha! Ha! Ha! Haaaa ... (*Anacheka kwa dharau.*)
- Nufaida:** Sawa! (*Anaondoka polepole. Siku inayofuata anakwenda Kituo cha Polisi Mawazo na kupokelewa na Afande Bahati.*)
- Afande Bahati:** Karibu! (*Anamkaribisha Nufaida.*)
- Nufaida:** Asante!
- Afande Bahati:** Unaitwa nani na unatokea wapi?
- Nufaida:** Ninaitwa Nufaida, na ninatokea Mtaa wa Maziwa.
- Afande Bahati:** Sawa! Unasemaje?
- Nufaida:** Nimekuja kutoa taarifa kuhusu utumikishaji wa mtoto. Rafiki yangu aitwaye Nginco anayeishi jirani na Kituo cha Daladala cha Mawasiliano anamtumikisha binti ambaye alitakiwa kuwa shuleni. Mbaya zaidi, hamlipi chochote.

- Afande Bahati:** Tunashukuru kwa taarifa dada. Wewe umejuaje?
- Nufaida:** Ngineo ni rafiki yangu, mara kwa mara huenda kwake.
- Afande Bahati:** Sawa! Kwa hiyo umeshuhudia kwa macho yako?
- Nufaida:** Ndiyo!
- Afande Bahati:** Unaweza kutuonesha nyumba ya Ngineo?
- Nufaida:** Ndiyo afande!
- Afande Bahati:** Asante! (*Anamwita afande Nzala*)
- Afande Nzala:** (*Anaitika kwa nguvu.*) Ndiyo afande!
- Afande Bahati:** Huyu mama amelea taarifa ya utumikishaji wa mtoto mdogo. Mtuhumiwa ni Ngineo anaishi karibu na Kituo cha Daladala cha Mawasiliano. Chukua pingu ili tukamkamate.
- Afande Nzala:** Ndiyo afande! (*Anachukua pingu. Wanaondoka na Nufaida ili akawaoneshe mahali anapokaa mtuhumiwa. Wanafika nyumbani kwa mtuhumiwa.*)
- Afande Bahati:** Hodi! (*Anagonga mlango.*)
- Ngineo:** Karibu! (*Anatoka ndani. Anakutana na polisi na Nufaida. Anashtuka baada ya kuona polisi wakiwa na pingu.*)
- Afande Nzala:** Uko chini ya ulinzi. (*Anamkamata Ngineo mikono na kumfunga pingu.*)
- Afande Bahati:** Mama, unatuhumiwa kwa kumtumikisha mtoto.
- Ngineo:** Hapana afande! Sijafanya kosa lolote. Niacheni jamani. (*Anaongea huku akitetemeka. Polisi wanaondoka na Ngineo na Kabala hadi Kituo cha Polisi.*)
- Afande Bahati:** Afande, mweke ndani!
- Afande Nzala:** Ndiyo afande! (*Ngineo anawekwa mahabusu. Anaomba apewe dhamana lakini ombi lake linakataliwa. Baada ya muda, Ngineo anatolewa mahabusu na kupelekwa ofisi ya upelelezi ili ahojiwe.*)
- Afande Bahati:** Mama hebu tueleze. Ilikuwa hadi ukaanza kumtumikisha mtoto mdogo kinyume cha sheria.
- Ngineo:** Mimi nililetewa huyo binti na mama yake afanye kazi na niwape malipo kidogo. Binti mwenyewe alikataa shule. (*Anahojiwa, na katika maelezo yake inaonekana ana makosa.*)
- Afande Bahati:** Mama, huoni kwamba umekiuka sheria? Ni kosa la jinai kumtumikisha mtoto kinyume cha sheria (*Anaendelea kuhojiwa.*)
- Ngineo:** Nisamehe afande. Sikujua. (*Anaongea huku akitetemeka kwa hofu*)
- Afande Bahati:** Umevunja sheria makusudi. (*Anaandika maelezo ya Ngineo, kisha anamwambia Ngineo asaini, naye anatii.*)

- Afande Bahati:** *(Anaita.)* Afande Nzala!
- Afande Nzala:** Ndiyo afande! *(Anaitika kwa sauti ya ukakamavu na unyenyekevu.)*
- Afande Bahati:** Chukua hii hati ya maelezo ya mtuhumiwa, kisha mrudishe mahabusu. Hakikisha umeandika hati ya mashitaka ili tumfikishe mahakamani kesho.
- Afande Nzala:** Ndiyo afande! *(Anakabidhiwa hati ya maelezo ya mtuhumiwa. Anamrudisha mtuhumiwa mahabusu, kisha anaandaa hati ya mashitaka.)*
- Afande Bahati:** Hati ya mashitaka ya mtuhumiwa iko tayari?
- Afande Nzala:** Ndiyo afande!
- Afande Bahati:** Nenda mahabusu ukamchukue tumpeleke mahakamani.
- Afande Nzala:** Ndiyo afande! *(Ngineo anapandishwa kwenye karandinga na kupelekwa mahakamani. Muda si mrefu, wanafika mahakamani na wanashuka kwenye karandinga. Wanaingia kwenye chumba cha mahakama.)*
- Polisi:** Koooti! *(Punde si punde, hakimumu anaingia na watu wote wanasimama.)*
- Hakimu:** Watu wote tuketi sasa. *(Watu wote wanakaa.)*
- Karani wa Mahakama:** *(Ananza kuita kesi)* Kesi ya jinai Na. 2/2019, Jamhuri dhidi ya Ngueneo Madulu Malulu.
- Ngineo:** *(Anasimamishwa kizimbani.)*
- Mwendesha Mashitaka:** Mheshimiwa, kesi leo imekuja kwa mara ya kwanza. Mshitakiwa Ngueneo yupo. Mheshimiwa ninaomba kumsomea mshitakiwa hati ya mashitaka.
- Hakimu:** Sawa! Hebu msomee mashitaka yake.
- Mwendesha Mashitaka:** Ndiyo Mheshimiwa! *(Anajibu na kumsomea Ngueneo mashitaka.)* Mshitakiwa, mnamo tarehe 9/8/2019 katika eneo lililopo ndani ya Wilaya ya Ubungo, Mkoa wa Dar es Salaam, ulikutwa ukimtumikisha mtoto aitwaye Kabala, huku ukijua ni kosa kisheria. Mshitakiwa unashitakiwa kwa kosa la kumtumikisha mtoto kinyume cha Sheria ya Haki ya Mtoto Na. 2/2019.
- Hakimu:** *(Anamuuliza mwendesha mashitaka.)* "Umemaliza?"
- Mwendesha Mashitaka:** Ndiyo Mheshimiwa!
- Hakimu:** Mashitaka hayo ni ya kweli? *(Anamuuliza Ngueneo kuhusu ukweli wa tuhuma hizo.)*
- Ngineo:** Ni ya kweli Mheshimiwa!

- Hakimu:** Je, mashitaka ni ya kweli? (*Anarudia kumuuliza Ngineo mara tatu.*)
- Ngineo:** (*Anakiri kosa mara zote tatu.*)
- Hakimu:** Una lolote la kujitetea? (*Anamuuliza Ngineo.*)
- Ngineo:** Sikujua kuwa ni kosa Mheshimiwa Hakimu. Mimi nilikuwa ninahitaji mtu wa kunisaidia kazi za nyumbani ili nimlipe ujira mdogo.
- Hakimu:** Una lolote la kusema? (*Mheshimiwa Hakimu anamuuliza Afande Bahati.*)
- Afande Bahati:** Mtuhumiwa ni mkosaji wa mara ya kwanza. Hata hivyo, anatakiwa apewe adhabu kali ili iwe fundisho kwa wengine.
- Hakimu:** Kwa mujibu wa kifungu kidogo cha 78 cha Sheria ya Haki ya Mtoto ya Mwaka 2019, mahakama inakutia hatiani na inakuhukumu kifungu cha miezi mitatu jela au faini ya shilingi milioni moja. Kosa hili umekiri mwenyewe mahakamani. Rufaa iko wazi ndani ya siku 21 kuanzia leo kama hautaridhika na uamuzi wa mahakama.
- Polisi:** Koooti (*Mahakama inaahirishwa. Ngineo anashindwa kulipa faini aliyopewa hivyo anachukuliwa na askari na kuwekwa kwenye karandinga na anapelekwa gereza tayari kwenda kutumikia kifungu chake.*)
- Afande Mapembe:** Hebu mchukue Kabala na mpeleke kituo cha ustawi na maendeleo ya jamii ili ahifadhiwe na kufanyiwa utaratibu wa kurudishwa shule. (*Anamwamrisha Afande Bahati.*)
- Afande Bahati:** Ndiyo afande! Kabala, twende (*Anamchukua Kabala na kumwingiza kwenye gari dogo la polisi kuelekea kituo cha maendeleo ya jamii.*)
- Mabala:** Karibuni sana, karibu ofisini! (*Wanafika kituo cha maendeleo ya jamii na kupokelewa na mhusika.*)
- Afande Bahati:** Asante! (*Wanafika ofisini na kuoneshwa mahali pa kuketi.*) Nimemleta huyu binti ili apate msaada wa kupelekwa shuleni. Huyu binti alikuwa anatumikishwa, na mtuhumiwa amekiri kosa na amehukumiwa na sasa yuko jela anatumikia kifungu chake.
- Mabubu:** Jamani! Inasikitisha sana. Sera, miongozo na kanuni za serikali zinapinga vikali suala la ajira kwa watoto kila leo. (*Anampokea Kabala na kumwambia, pole mwanangu.*) Tutawasiliana na wazazi wake ili kuhakikisha anarudi shule kuendelea na masomo yake.
- Afande Bahati:** Asante! (*Anaaga na kuingia kwenye gari la polisi na kuondoka.*)

Maswali

1. Ngineo alionesha tabia gani kwa Kabala?
2. Nani alimsomea mtuhumiwa hati ya mashtaka? Kwa nini?
3. Ngineo alishitakiwa na kuhukumiwa kwenda jela kwa kosa gani?
4. Unafikiri kwa nini Kabala alipelekwa kituo cha ustawi na maendeleo ya jamii?
5. Umejifunza nini kutokana na matini uliyoisoma?
6. Utumikishaji wa watoto kama aliofanyiwa Kabala unasababisha athari gani?

Zingatia

Matini inaweza kufupishwa kwa kuandikwa kwa muhtasari. Kuandika muhtasari ni kuelezea mawazo au hoja kuu zilizomo katika matini kwa kutumia maneno mengine bila kupotosha maana ya msingi ya matini iliyosomwa. Lengo la kufupisha habari ni kuwapa wasomaji uwezo wa kupambanua walichokisoma na kukielewa kwa haraka na kwa kifupi. Muhtasari ni muhimu kwa sababu husaidia kupima uelewa wa msomaji katika kuchambua hoja kuu na kufupisha mawazo ndani ya matini.

Ili kuandika vizuri muhtasari, mwandishi anatakiwa kusoma matini aliyopewa zaidi ya mara moja ili kupata uelewa wa kutosha kuhusu matini hiyo. Pia, mwandishi anapaswa kutumia lugha fasaha na sanifu kwa mtiririko mzuri wa hoja. Vilevile, mwandishi anapaswa kuandika sentensi zilizo kamili na kutumia kwa usahihi alama za uakifishaji. Aghalabu, matini iliyofupishwa huwa theluthi moja ya matini ya awali.

Kutoa maoni nj kitendo cha kuelezea mtazamo, kutoa tathmini, au kufanya uchambuzi wa mawazo au hoja zilizotolewa katika matini. Baada ya kusoma matini na kuandika muhtasari, msomaji anaweza kutoa mtazamo wake kuhusu hoja zilizomo katika matini kwa kukubaliana au kupinga hoja hizo. Aidha, anaweza kuongeza mtazamo mpya au mbadala; kuchambua mantiki na uthibitisho uliotumika; kufafanua au kupanua hoja kwa mifano zaidi; au kupendekeza maboresho au marekebisho.

Shughuli ya

5.3



Chunguza matini ndefu changamani isemayo “Ulemavu si ugonjwa” kisha fanya yafuatayo:

- Bainisha matukio yaliyokufurahisha yanayotokana na matini uliyoichunguza.
- Kwa kutumia aya moja, elezea kwa nini mwandishi anasema ulemavu si ugonjwa.
- Andika muhtasari wa hoja kuu zinazopatikana katika matini uliyoichunguza.
- Toa maoni yako kuhusu matini uliyoichunguza.

Ulemavu si ugonjwa

Siku ya Jumatatu ya tarehe 20 Februari 2020, majira ya saa 12 alfajiri, nilipata ajali mbaya ya gari iliyotaka kuondoka na roho yangu. Siku hiyo nilikuwa ninatembea kandokando ya barabara nikielekea shuleni. Ajali hiyo ilitokana na kugongana kwa basi la Tiririka lililokuwa linafanya safari zake kati ya Iringa na Dodoma, na daladala iliyokuwa inatoka Mvumi kwenda Mtera. Basi hilo likiwa katika mwendokasi, ghafla dereva alimuona mtoto akivuka barabara. Dereva alipojaribu kumkwepa ili asimgonge, alihama kutoka upande wake na kwenda upande wa kulia ambako kulikuwa na daladala iliyokuwa inakuja. Hapo ndipo magari hayo yaligongana uso kwa uso. Baada ya kugongana, daladala ilisukumwa hadi pembeni mwa barabara nilikokuwa ninatembea. Nilipoona daladala inakuja, nilihamaki na kukimbia ovyo na nilitumbukia kwenye mtaro mkubwa na kuvunjika mguu wa kushoto na kupata majeraha sehemu mbalimbali za mwili.

Chanzo cha ajali hiyo kilikuwa uzembe wa dereva wa basi la abiria aliyekuwa anaendesha kwa mwendo wa kasi bila tahadhari. Kwa hakika, ajali hiyo ilikuwa na madhara makubwa, kwani abiria kumi wa daladala na abiria saba wa basi walipoteza maisha papo hapo. Aidha, abiria ishirini wa basi na kumi wa daladala walijeruhiwa vibaya.

Polisi walipigiwa simu na mashuhuda wa ajali hiyo na walifika haraka katika eneo la tukio. Waliwakamata madereva wote wawili na kuwapeleka katika Kituo cha Polisi cha Mtera. Punde si punde, gari la kubeba wagonjwa liliwasili eneo la ajali, likatubeba majeruhi hadi hospitali ya wilaya kwa ajili ya kupatiwa huduma za matibabu.

Tukiwa njiani kuelekea hospitalini, nilipoteza fahamu kutokana na kuvuja damu nyingi. Nilizinduka siku ya pili majira ya saa 11:00 jioni. Nilishangaa kuona nimezungukwa na wazazi wangu, madaktari, wauguzi na wanafunzi wenzangu huku nikiwa nimefungwa bendeji sehemu mbalimbali za mwili. Nilishtuka kuona kuwa nilikuwa na mguu mmoja tu. Daktari aliniambia kuwa mguu moja umekatwa kwa sababu ulikuwa umevunjika vibaya.

Baada ya matibabu ya mwezi mmoja, niliruhusiwa kutoka hospitalini, lakini tayari nilikuwa na ulemavu wa kudumu. Nilipofika nyumbani, wanafunzi wenzangu ambao hawakupata nafasi ya kuniona nilipokuwa hospitalini, walikuja kunijulia hali na kunipa pole. Nilifarijika sana lakini nilikuwa nimekata tamaa ya kuendelea na masomo. Nilikuwa ninajawa na mawazo huku nikijiuliza maswali mbalimbali, ikiwa pamoja na namna ya kurudi shuleni.

Nilikata shauri kuwaambia wazazi wangu kwamba nilitaka kuacha shule. Wazazi wangu walikataa katakata wazo hilo. Walinishauri na kunisihi nisiache shule. Baada ya ushauri na nasaha za wazazi wangu, niliridhia kuendelea na shule.

Nilinunuliwa kitimwendo cha kutembelea pamoja na mahitaji yote ya shule. Nilipofika shuleni, nilipokelewa na walimu na wanafunzi wenzangu; na walinipa pole kwa kupata ulemavu wa kudumu.

Pamoja na ulemavu wangu, niliendelea kusoma kwa bidii. Nilifanya bidii katika masomo yangu ili kuhakikisha kuwa ninaambulia chochote katika matokeo ya mthani wa mwisho wa kidato cha nne. Matokeo ya mthani yalipotoka, nilifaulu vizuri kwa kupata daraja la kwanza. Nilifaulu vizuri zaidi katika masomo ya Kiswahili, hisabati, biolojia, kemia na fizikia. Walimu wangu walinipigia simu na kunipongeza kwa ufaulu huo.

Nilichaguliwa kujiunga na kidato cha tano, tahasusi ya fizikia, kemia na bailojia katika Shule ya Sekondari Jangwani Jijini Dar es Salaam. Wazazi wangu walifurahi sana. Muda wa kwenda shuleni ulipowadia, walininunulia mahitaji yote ya shule. Shule ilipofunguliwa, baba alinipeleka shuleni kuripoti. Tulipofika shuleni, tulipokelewa na walimu na wanafunzi wenzangu ambao walikuwa wametangulia kufika. Nilipewa ushirikiano wa kutosha. Nilisoma kwa bidii. Nilikuwa nikiongoza katika majaribio na mthani ya mihula. Walimu wangu walinipenda sana.

Baada ya miaka miwili, nilifanya mthani wa kumaliza kidato cha sita, kisha nilirejea nyumbani kwetu kusubiri matokeo. Baada ya miezi kadhaa, matokeo yalitangazwa. Nilikuwa nimefaulu kwa kiwango cha daraja la kwanza tena. Wazazi wangu walifurahi na kunipongeza kutokana na juhudi na mafanikio hayo.

Niliomba kujiunga na Chuo Kikuu cha Afya na Sayansi Shirikishi Muhimbili na nilichaguliwa kusomea shahada ya awali ya udaktari wa binadamu. Wakati nipo chuoni nilisoma kwa bidii sana. Baada ya miaka mitano, nilihitimu masomo yangu ya udaktari na niliajiriwa katika Hospitali ya Sekou Toure iliyopo Jijini Mwanza. Baada ya kufanya kazi kwa miaka mitatu, niliamua kujiendeleza kimasomo kwa kusomea shahada ya umhiri katika fani ya mifupa. Nilihitemu baada ya miaka mitatu na sasa mimi ni daktari bingwa wa mifupa katika Hospitali ya Benjamin Mkapa, Dodoma. Kwa hakika, ulemavu si ugonjwa.

Zoezi la 5.2

1. Kwa nini ni muhimu msomaji kuwa makini wakati wa kusoma matini ndefu changamani?
2. Ni mambo gani yanapaswa kuzingatiwa wakati wa kuandika muhtasari wa hoja zilizomo katika matini?
3. Uandishi wa muhtasari wa hoja zilizomo katika matini changamani una faida gani?

Shughuli ya 5.4

Kwa kutumia vyanzo mbalimbali ikiwemo TEHAMA, tafuta na soma matini ndefu changamani. Kisha, chambua hoja kuu zilizomo katika matini hiyo na andika muhtasari wake.

Zoezi la marudlo

1. Oanisha maelezo yaliyopo katika **Safu A** na ufafanuzi au dhana zilizopo katika **Safu B** kwa kuandika herufi ya jibu sahihi ili kukamilisha maana.

Safu A	Safu B
(i) Kitendo cha kufupisha matini kwa maneno machache bila kupoteza maana au lengo la matini	A. Jambo muhimu katika kuandika muhtasari
(ii) Kutumia maneno na istilahi mbalimbali pamoja na maudhui mchanganyiko	B. Kutoa maoni
(iii) Msomaji huzingatia matamshi sahihi ya maneno na mkazo katika silabi	C. Kusoma kwa sauti
(iv) Kutumia lugha fasaha na yenye mtiririko mzuri wa mawazo	D. Kusoma kimya
(v) Kitendo cha kueleza mtazamo wako, tathmini, au uchambuzi kuhusu mawazo au hoja zilizotolewa katika matini.	E. Matini changamani
	F. Kuandika muhtasari
	G. Kuchagua matini

2. Msomaji anapaswa kufanya nini ili aweze kuandika muhtasari bila kupotosha ujumbe?
3. Kwa nini mwandishi anatakiwa kusoma mara kadhaa matini aliyopewa ili kuandika muhtasari mzuri?
4. Fafanua namna msomaji anavyoweza kutoa mtazamo wake juu ya hoja zilizomo katika matini ndefu changamani.

Kuwasiliana kwa njia ya maandishi

Utangulizi

Kuandika ni stadi muhimu katika mawasiliano. Katika sura hii, utajifunza kuandika insha za wasifu na insha za hoja za kisanaa na zisizo za kisanaa. Pia, utajifunza mambo muhimu ya kuzingatia katika kuandika insha na kumbukumbu za mikutano. Umahiri utakaoujenga utakuwezesha kukuza stadi ya kuandika insha na kumbukumbu za mikutano kwa ubunifu na unyumbufu.

Fikiri



Namna unavyoweza kuwasilisha mawazo mbalimbali kwa njia ya maandishi

Kuandika insha za wasifu za kisanaa



Soma insha ifuatayo, kisha jibu maswali yanayofuata.

Paka na binadamu

Paka ni miongoni mwa wanyama wenye urafiki na binadamu. Binadamu amekuwa akimuamini na kumpa Paka fursa ya kutekeleza majukumu mbalimbali nyumbani kwake.

Sauti nyororo isikikayo mithili ya kinanda humpa paka upekee wa ajabu. Akimwona mgeni huimba kwa sauti nyororo nyaau! Nyaau! Nyaau! Nyaau! Sauti yake hupendwa na kila mtu ndani ya familia. Sauti yake ni ulinzi wa kutosha dhidi ya wapangaji wasio rasmi, wanaosumbua na kuharibu vitu vya binadamu.

Manyoya yake laini na yanayovutia pamoja na macho yake ya duara kama gololi ni baadhi ya sifa zinazompa upekee. Paka ni kitulizo murua cha binadamu dhidi ya maadui wao. Kiumbe huyo huficha kucha zake vizuri ili zisimdhuru mtu aliyembeba.

Tabia hii amefundishwa na mama yake, ndiyo maana wahenga husema “Samaki mkunje angali mbichi”.

Paka wetu ni mwaminifu na mlinzi bora, kwake udokozi ni mwiko. Hana tabia ya kula chakula isipokuwa anapowekewa kwenye chombo chake maalumu. Chakula chake ni maziwa, mchuzi na mifupa ya samaki. Paka amekirimiwa weledi wa kijasusi. Huweza kuwapigisha kwata maadui aliowateka. Hawa ni wale wenye nia ya kumdhuru binadamu. Paka anapowaona maadui, hutembea kwa kunyata taa! Taa! Taa! Taa! kisha huwarukia na kuwakamata. Paka awapo vitani, ni nadra kupata ngeu kisogoni. Ni jasiri ajabu! Asikiapo mlio wa nyoka siii! Siiii! Siiii! hujipanga haraka kwa ajili ya kumdaka mithili ya golikipa. Siku moja, tulisikia purukushani darini. Paka alikuwa anapambana na nyoka mwenye sumu kali. Paka alifanikiwa kumuua nyoka huyo na kushuka naye kutoka darini kwa ujasiri.

Mali zetu kama vile nguo, vitabu, madaftari na nafaka zina usalama wa kutosha kutokana na kuwapo kwake. Paka ana mbinu nyingi za kumdhibiti adui yetu panya. Wakati mwingine hunyamaza kimya na kujificha kwenye kona huku akimsubiri panya ambaye ni kitoweo chake ili akikamate. Hakika paka ni rafiki mzuri kwani “Akufaaye kwa dhiki ndiye rafiki wa kweli”.

Vilevile, Paka hukwea miti kwa maringo mithili ya kinyonga afukuzaye mawindo. Hapa hunoa mikuki yake tayari kwa mawindo ya maadui. Wakati wa michezo, hufanya mazoezi ya kupanda juu ya miti mirefu. Paka ni mfalme kwa watu wenye busara ya kujali viumbe. Urafiki wa binadamu na paka ni wa kudumu. Wanyama wengine hawana budi kuiga matendo ya paka kwa binadamu. Ninawashauri watu wasimdhuru Paka. Badala yake wawajali na kuwapatia mahitaji yao kama vile samaki, maziwa, nyama, maji na matibabu.

Maswali

1. Lipi ni wazo kuu la insha hii?
2. Insha uliyoisoma ni ya aina gani? Kwa nini?
3. Insha uliyoisoma ina muundo gani?
4. Lipi ni hitimisho la insha uliyoisoma?

Zingatia

Insha ni kifungu cha maneno chenye mpangilio maalumu unaoelezea mtu, kitu, au jambo fulani. Insha ya kisanaa ni insha inayotumia lugha ya kisanaa na yenye mvuto na iliyosheheni nahau, methali na tamathali za semi. Aidha, insha hutumia mbinu zingine za kisanaa kama tashtiti, takriri na tanakali sauti. Insha za wasifu za kisanaa ni insha zinazotumia lugha ya kisanaa kuelezea sifa binafsi za mtu, kitu, au mahali. Mara nyingi insha hizi huzingatia sura, rangi, vipimo au tabia.

Shughuli ya 6.1

Chunguza kwa makini jamii ya wenyeji wanaokuzunguka. Kisha andika insha ya wasifu ya kisanaa kuhusu jamii hiyo.

Kuandika insha za wasifu zisizo za kisanaa



Soma insha ifuatayo, kisha jibu maswali yanayofuata.

Hapo zamani alikuwapo mzee mmoja aliyeishi katika Kijiji cha Manajuka. Mzee huyu aliitwa Kanju. Mzee Kanju alikuwa maarufu sana kutokana na ucheshi na uhodari wake wa kufanya kazi. Katika himaya yake, alifuga mbuzi, kondoo, ng'ombe na kuku. Mzee Kanju alikuwa na watoto wawili mapacha, ambao ni Merija na Sirimo. Aliwapenda sana watoto wake kutokana na juhudi walizozionesha katika masomo yao. Aliwasihi wazingatie masomo kwani aliamini kuwa elimu ni ufunguo wa maisha.

Siku moja, Merija na Sirimo walirudi kutoka shule na kumkuta baba yao, Mzee Kanju ameketi barazani. Walimsalimia baba yao. Mzee Kanju aliwaitikia na kuwauliza walichojifunza shuleni siku hiyo. Merija alimjibu kuwa alijifunza maana, aina na umuhimu wa insha. Pia, aliendelea kusema kuwa alijifunza mambo ya kuzingatia katika uandishi wa insha. Mzee Kanju alimtaka binti yake ampe maelezo zaidi kuhusu aina za insha walizojifunza. Merija alimjibu kuwa walijifunza insha za wasifu za kisanaa na zisizo za kisanaa. Mzee Kanju alimuuliza tena, "Mbona ninasikia kuna insha za hoja na insha za wasifu?" Merija alimjibu, "Ndiyo baba! Mwalimu wetu alitueleza jana kuwa tutajifunza insha za hoja katika kipindi kijacho". Mzee Kanju alimuuliza Sirimo, "Unaweza kunielezea kidogo kuhusu insha hizo za wasifu mlizojifunza na mambo ya kuzingatia katika uandishi wake?" Sirimo akamjibu kuwa insha za wasifu huandikwa ili kutoa maelezo kuhusu mtu au kitu fulani. Akaendelea kueleza kuwa mambo ya kuzingatia katika uandishi wa insha ni uteuzi na uelewa wa mada. Pia, ni muhimu kuteua lugha itakayotumika kulingana na hadhira na kutumia mifano ili kushadidia hoja. Vilevile, ni muhimu kuzingatia mpangilio au muundo wa insha. Maelezo ya Merija na Sirimo yalimfanya Mzee Kanju aamini kuwa watoto wake walikuwa makini kufuatilia masomo yanayofundishwa na walimu wao. Hivyo, aliwaahidi kuendelea kuwanunulia vitabu vya masomo mbalimbali wanayosoma shuleni. Kwa kuwa hakuwa na fedha za kutosha, aliamua kuuza ng'ombe mmoja ili apate fedha za kuwanunulia watoto wake mahitaji ya shule. Merija na Sirimo walifurahi sana na walimuahidi baba yao kuwa watasoma kwa bidii ili wafike chuo kikuu.

Maswali

1. Mzee Kanju ana wasifu gani?
2. Kutokana na habari uliyoisoma, mwandishi amebainisha aina ngapi za insha?
3. Ni mambo gani ya kuzingatia wakati wa uandishi wa insha?
4. Unafikiri insha uliyoisoma ni ya aina gani?
5. Aina ya insha uliyoitaja katika swali la 4 ina sifa gani?
6. Kwa nini Mzee Kanju alisema kuwa elimu ni ufunguo wa maisha?

Zingatia

Insha za wasifu zisizo za kisanaa ni insha zisizotumia lugha ya kisanaa. Lugha isiyo ya kisanaa haihusishi matumizi ya vipengele vya kisanaa kama vile methali, nahau, vitendawili, misemo au tamathali za semi. Kwa kawaida insha hizi huwa na mada bainifu anayoilega mwandishi kuhusu namna mtu au kitu kilivyo kwa kuzingatia tabia, vitendo au mandhari kwa lugha isiyo ya kisanaa.

Shughuli ya 6.2

Kwa kutumia vyanzo mbalimbali, soma mifano ya insha zisizo za kisanaa huku ukichunguza vipengele vyake. Kisha andika insha ya wasifu isiyo ya kisanaa kuhusu shule yako.

Kuandika insha za hoja za kisanaa

Soma insha ifuatayo, kisha jibu maswali yanayofuata.

Ufugaji wa nyuki

Nyuki ni miongoni mwa viumbe waliopo duniani wenye manufaa kwa binadamu. Nyuki hupatikana katika kundi la wadudu. Viumbe wengine wa jamii hii ni panzi, nzi, mende, mbu na wengineo. Nyuki ni rafiki kipenzi wa binadamu kutokana na uhusiano wao wa muda mrefu. Nyuki huleta faida mbalimbali katika maisha ya binadamu.

Kwanza, nyuki husaidia uchavushaji wa maua. Binadamu hupanda mimea mashambani lakini hana uwezo wa kuichavusha. Viumbe hawa huweza kuhamisha chavua na kuzipeleka sehemu za kike za maua. Mimea huzaa kutokana na shughuli hii ya nyuki.

Pili, nyuki hutengeneza asali na nta. Wanapokuwa kazini, nyuki hufanya kazi kama vichaa. Utawaona wakizurura kwenye majalala ya takataka na mifereji ya maji kukusanya malighafi. Kila mmoja hutia juhudi katika kazi hiyo, kwani wanajua kuwa "Umoja ni nguvu na utengano ni udhaifu". Wadudu hawa huchakata taka na chavua kutengeneza asali na nta. Ukiitazama asali na nta hiyo, huwezi kuamini kuwa

imetokana na malighafi hizo. Hapo usemi wa wahenga usemao “Ukiona vyaelea vimeundwa” hutimia.

Asali na nta huwapatia binadamu fedha. Fedha hizo huzitumia kununulia mahitaji mbalimbali kama vile chakula, mavazi na malazi. Pia, asali hutumika kama tiba ya magonjwa mbalimbali kwa jamii nyingi duniani. Nta nayo hutumika kama malighafi viwandani kama vile kutengeneza gundi inayotumika kutengenezea viatu, mikoba na vitu vingine vya thamani. Vilevile, nta hutumika kutengenezea mishumaa. Hakika nyuki ni rafiki mzuri wa binadamu kwani “Akufaaye kwa dhiki ndiye rafiki wa kweli”.

Hakuna kizuri kisichokuwa na kasoro. Licha ya kuwa na faida, nyuki huweza kusababisha madhara kwa binadamu na mifugo. Wadudu hawa huwa na hasira kama morani. Nyuki wanaweza kuwashambulia maadui wao, binadamu na mifugo, kama jeshi lishambuliavyo maadui kutoka pande zote. Mashambulizi ya nyuki yanaweza kusababisha vifo kwa maadui wao. Huweza kuwaua hata marafiki zao wawatengenezeao makazi. Kweli hasira hasara. Hivyo, tahadhari kubwa inapaswa kuchukuliwa ili kulinda usalama wa maisha ya watu na mifugo.

Pamoja na kwamba nyuki wanaweza kuleta hasara, hatuna budi kuwafuga na kuwapenda kwani manufaa yao kwetu ni makubwa kuliko hasara. Hakika nyuki wana umuhimu mkubwa kwa binadamu, jamii na taifa.

Maswali

1. Insha uliyoisoma ni ya aina gani?
2. Insha uliyoisoma imegawanyika katika sehemu ngapi?
3. Nyuki wana faida gani zingine tofauti na zile zilizoandikwa kwenye insha?
4. Unafikiri ni maneno gani mengine yanafaa kuwa kichwa cha insha?
5. Ni usanaa upi uliojitokeza katika insha uliyoisoma?

Zingatia

Insha za hoja huandikwa ili kutoa mawazo au maoni kuhusu jambo fulani. Mathalani, zinaweza kuelezea umuhimu wa elimu na misitu, faida za kutunza mazingira, au biashara huru. Insha hizi huelezea au hudadisi jambo kwa kutoa hoja kadhaa. Hoja hizo zinaweza kuwa za kukubali au kupinga jambo hilo. Hivyo, insha za hoja hutetea au hupinga mawazo ya aina fulani kwa kutoa uthibitisho ulio dhahiri.

Insha ya hoja ya kisanaa huandikwa kwa kujenga hoja zenye uzito, sambamba na mifano ya kuthibitisha hoja hizo kwa kutumia lugha ya kisanaa. Lugha hiyo ya kisanaa huwa na mvuto na yenye nahau, methali na tamathali za semi. Uandishi wa insha hizi huzingatia kuwepo kwa wazo au mada ya kuandikwa na dondoo za hoja zinazotambulisha mada. Pia, huwa na vipengele vinne muhimu ambavyo ni kichwa, utangulizi, kiini na hitimisho. Hivyo, insha hizi huwa na utangulizi unaotambulisha mada, kiini chenye hoja na uthibitisho wake, pamoja na hitimisho lenye kutoa maoni, mapendekezo au suluhisho. Kadhalika, huzingatia ushikamani, matumizi sahihi ya alama za uakifishaji na lugha fasaha na sanifu.

Umechaguliwa kushiriki mashindano ya uandishi wa insha. Katika mashindano hayo, unatakiwa kuandika insha ya kisanaa. Chagua mada moja ya kuandikia insha yenye maneno kati ya 150 na 200, kisha elezea mambo yanayozingatiwa katika uandishi wa insha.

Kuandika insha za hoja zisizo za kisanaa



Soma insha ifuatayo, kisha jibu maswali yanayofuata.

Elimu ni maarifa au ujuzi aupatao mtu ili kukabiliana na mazingira yake. Maarifa au ujuzi huweza kupatikana shuleni, nyumbani au katika jamii.

Elimu ni muhimu katika jamii yoyote kwa sababu humuwezesha binadamu kuyakabili mazingira yake. Lengo kuu la elimu ni kuhakikisha binadamu anapata maendeleo endelevu katika maisha yake. Kutokana na elimu, binadamu anaweza kujiajiri au kuajiriwa hivyo kujipatia kipato cha kuendeshea maisha yake. Aidha, elimu husaidia kujenga taifa imara. Taifa linapowekeza katika elimu bora, hujenga kizazi cha sasa na cha baadaye chenye uelewa wa kutosha kuhusu maisha. Ni muhimu kuwekeza katika elimu itakayowajengea wananchi ujuzi na maarifa ili waweze kujikwamua kutoka katika umaskini na kulijenga taifa bora.

Elimu ni muhimu kwa sababu husaidia kutatua matatizo yaliyopo katika jamii. Kila mtu huishi maisha ya aina fulani. Ujuzi alionao humsaidia kutatua matatizo yanayomkabili na yanayoikabili jamii yake. Kwa mfano, elimu ya mazingira huwasaidia wanajamii kutunza mazingira. Elimu ya afya husaidia jamii kukabiliana na maradhi pamoja na kudumisha afya zao ili kuwa imara muda wote hivyo, kuwawezesha kufanya kazi kwa bidii ya kujenga taifa lao.

Vilevile, elimu huipatia jamii maarifa ya kufikiri kitunduizi hivyo kuiwezesha kufanya uamuzi sahihi wa kimaisha. Kutokana na ujuzi na kufikiri kitunduizi, jamii inaweza kugundua na kuvumbua vitu mbalimbali. Kwa mfano, maendeleo ya sayansi na teknolojia yamesaidia kugunduliwa na kuvumbuliwa kwa vifaa vya kisasa. Baadhi ya vifaa hivyo ni zana za kilimo, mashine, ndege, kompyuta, zana za kivita, simu za mkononi, treni za umeme, magari na vifaatiba.

Zaidi ya hayo, elimu husaidia kutambua thamani ya muda. Muda ni rasilimali muhimu katika maendeleo ya binadamu. Kwa kuwa muda ni mali, watu huutumia vizuri kufanya shughuli mbalimbali za kiuchumi na kijamii ili kuongeza uzalishaji mali kwa lengo la kukuza uchumi wao na wa nchi kwa ujumla.

Elimu husaidia pia kujenga tabia njema, hivyo huwezesha kupambanua mema na mabaya. Elimu huwafanya raia kuwa watu wema na wenye maadili. Watu wenye elimu hukemea matendo maovu katika jamii kama vile mila potofu za ukeketaji watoto wa kike na mauaji ya vikongwe na watu wenye ulemavu wa ngozi.

Hali kadhalika, elimu huchochea uelewa kuhusu haki za msingi za binadamu katika jamii. Haki ni kitu au huduma ambayo binadamu hustahili kuipata kutoka kwa wengine au mamlaka husika kwa mujibu wa sheria. Jamii ya watu walioelimika hudai haki zao za msingi pale zinapokiukwa. Kwa mfano, utoaji wa elimu kwa mtoto wa kike katika baadhi ya jamii ni jambo ambalo lilikuwa halipewi kipaumbele. Hata hivyo, kutokana na elimu, jamii nyingi zimeelimika na kutambua umuhimu wa elimu kwa watu wote.

Elimu ni muhimu kwa sababu ndio urithi pekee kwa binadamu ambao hauharibiki. Urithi wa mali huisha, lakini urithi wa elimu hudumu. Hivyo, ni vizuri kurithisha elimu kuliko kurithisha mali.

Pia, elimu huwafanya watu wajiamini. Kujiamini ni hali ya kuwa na imani binafsi ya kuweza kufanya jambo fulani. Elimu huwasaidia watu kujiamini katika kufanya mambo mbalimbali. Kujiamini husababisha kuwa na uthubutu wa kuhoji masuala mbalimbali ili kupata majibu, ikiwa pamoja na kudai haki zao pale zinapokiukwa.

Hivyo, jamii haina budi kuwekeza katika elimu kwa kuwa huwasaidia watu katika nyanja mbalimbali za maisha. Kwa sababu hiyo, elimu ni mwanga na ufunguo wa maisha. Kwa kuzingatia hili, elimu inayotolewa lazima iwe ya kujenga fikra za ubunifu na ugunduzi wa kiteknolojia utakaoleta maendeleo endelevu na kuwawezesha vijana na taifa kwa ujumla kushindana katika soko la ajira. Kwa kufanya hivyo, elimu itasaidia kutatua changamoto mbalimbali zinazojitokeza katika maisha ya kila siku.

Maswali

1. Unafikiri insha uliyoisoma inafaa kuwa na kichwa gani?
2. Insha uliyoisoma ni ya aina gani? Kwa nini?
3. Aina ya insha uliyoitaja katika swali la 2 ina sifa gani?
4. Ni hoja gani zimejengwa na mwandishi wa insha hii kuhusu elimu?
5. Ni sentensi ipi inaonesha utangulizi na ipi inaonesha hitimisho katika insha uliyoisoma?
6. Ni mafunzo gani umeyapata kutokana na insha uliyoisoma?

Zingatia

Kuna sehemu nne muhimu za kuzingatia katika uandishi wa insha ya hoja yenye mtiririko mzuri. Sehemu ya kwanza ni kichwa cha insha. Sehemu hii hubeba mada ya insha ambayo huelezea kwa muhtasari kuhusu insha. Aghalabu, mada ya insha huandikwa kwa herufi kubwa, sehemu ya juu katikati ya insha. Pia, hupigiwa mstari, hasa katika uandishi kwa kutumia mkono. Kwa kawaida, huandikwa kwa wino uliokozwa katika uandishi wa kuchapa. Sehemu ya pili ni mwanzo wa insha. Huu ni utangulizi ambao hufasili au huelezea kwa kifupi jambo litakalowasilishwa

na aghalabu huandikwa katika aya moja. Tatu ni kiini cha insha, ambacho hubeba mawazo ya mwandishi na huandikwa katika mtiririko wa aya. Sehemu ya nne ni hitimisho. Katika sehemu hii, mwandishi huhitimisha mawazo yake aliyoyayaeleza katika insha yake, ambapo huweza kutoa maoni na mapendekezo yake kuhusu jambo aliloliandikia. Katika sehemu hii, mwandishi hana budi kuandika muhtasari wenye mvuto kwa msomaji wake. Mambo mengine ya kuzingatia katika uandishi wa insha ni kwamba, mwandishi hana budi kupangilia mawazo yake kimantiki ili kuwa na mtiririko mzuri wa maudhui kuanzia mwanzo hadi mwisho. Ili kuepuka kumchanganya msomaji wake, kila aya inapaswa kubeba wazo kuu moja tu.

Vilevile, mwandishi anatakiwa atoe hoja zenye mashiko, uzito na ushawishi. Hoja zinazoandikiwa ni vyema ziambatane na mifano. Pia, mwandishi anapaswa kuzingatia taratibu za uandishi. Taratibu za uandishi ni kama vile matumizi ya herufi kubwa na ndogo na uwekaji wa alama za uakifishaji. Hali kadhalika, anapaswa kupanga hoja zake kwa mtiririko mzuri ili kumwezesha msomaji kuelewa kile alichokusudia. Aidha, mwandishi anapaswa aeleeza kwa uwazi na kwa kina mambo ya msingi kuhusu suala analolijadili. Maelezo yake yanapaswa yawe na mvuto utakaomshawishi msomaji kuendelea kusoma insha. Mambo ya msingi kuhusu suala linalojadiliwa ni pamoja na fasili, sababu, umuhimu, faida, hasara au mapendekezo kulingana na mada inayohusika.

Aidha, mwandishi anapaswa kuzingatia uteuzi mzuri wa maneno yanayoeleweka na yanayolenga kumshawishi msomaji wake. Maneno hayo lazima yaendane na mada inayozungumziwa. Lugha isiyo fasaha isitumike katika uandishi wa insha za hoja. Aidha, mwandishi anatakiwa kuepuka matumizi ya vifupisho katika uandishi wa insha yake. Kwa mfano, badala ya kutumia "n.k." atumie "na kadhalika", badala ya "k.m." atumie "kwa mfano", na badala ya "k.v." atumie "kama vile". Sababu ya kuepuka kutumia vifupisho ni kuepuka uwezekano wa kuwa na tafsiri tofauti miongoni mwa wasomaji. Vilevile, mwandishi anatakiwa aoneshe msimamo wake dhahiri katika ujenzi wa hoja zake. Hivyo, anapaswa atoe hoja madhubuti zinazoshadidiwa kwa mifano dhahiri yenye mashiko kwa kile anachokitetea.

Shughuli ya 6.4

Umealikwa kutoa mada katika Kilele cha Madhimisho ya Siku ya Mazingira Duniani. Andika insha ya hoja isiyo ya kisanaa kuhusu uharibifu wa vyanzo vya maji.

Zoezi 6.1

1. Kwa nini insha za hoja na insha za wasifu huandikwa?
2. Fafanua kwa ufupi muundo wa insha.
3. Chagua mada uipendayo, kisha iandikie insha ya wasifu ya kisanaa.
4. Soma kisa kifuatacho, kisha fuata maelekezo yanayofuata.

Jumbi hakwenda shuleni kwa siku tatu mfululizo. Kitindi aliamua kwenda nyumbani kwao ili kujua kinachoendelea. Alipofika, alimkuta mama yake Jumbi ni mgonjwa mahututi. Baada ya wiki moja, Jumbi alirejea shuleni. Mwalimu alitaka kumuadhibu Jumbi kwa sababu ya utoro.

Maelekezo: Fikiria wewe ni Kitindi. Andika insha ya kisanaa yenye maneno yasiyopungua 200 na yasiyozidi 250 ili kumtetea Jumbi asiadhibiwe na mwalimu.

5. Andika insha ya hoja ya kisanaa yenye maneno yasiyopungua 250 na yasiyozidi 300 kuhusu mada mojawapo kati ya hizi zifuatazo:
 - (a) Unyanyasaji wa watoto
 - (b) Elimu ya utandawazi
 - (c) Dawa za kulevya

Kuandika kumbukumbu za kikao

Soma habari ifuatayo, kisha jibu maswali yanayofuata.

Katika Kijiji cha Mbalule, palikuwa na mzee mmoja aliyejulikana kwa jina la Nyasuma. Mzee Nyasuma alikuwa na mke na mtoto mmoja wa kike aliyejulikana kwa jina la Zuneka.


Zuneka alikuwa mtoto pekee katika familia yake, hivyo alipendwa sana na wazazi wake. Licha ya kuwa mtoto pekee kwao, Zuneka alikuwa mtiifu na mwenye adabu sana kwa watu wote. Hali hiyo ilimfanya apendwe sana na watu wote katika kijiji chao. Zuneka alikuwa mwanafunzi wa kidato cha pili katika Shule ya Sekondari Kipupwe. Katika shule hiyo, walimu wengi walimpenda sana kutokana na nidhamu yake. Jitihada zake katika masomo zilimpa sifa nzuri shuleni hapo na katika shule za jirani.

Zuneka alikuwa hodari wa kusimamia usafi wa mazingira kila alipofika shuleni. Alihakikisha kuwa mazingira yote ya shule ni safi kabla ya kuingia darasani kwa sababu alikuwa kiranja mkuu wa shule yao. Siku moja, baada ya shule kufunguliwa, Zuneka na viongozi wengine wa serikali ya wanafunzi walifanya kikao. Katika kikao

hicho, alikuwapo Mwalimu Lungo ambaye alikuwa zamu wiki hiyo. Pia, alikuwapo Mwalimu Kitindi ambaye alikuwa mwalimu wa unasihi. Kikao kiliongozwa na Zuneke ambaye alikuwa mwenyekiti.

Mwenyekiti **alifungua kikao** kwa kuwakaribisha wajumbe. Katika salamu za ufunguzi, alianza kwa kuwapongeza wajumbe kwa likizo ndefu waliyokuwa nayo na kwa majukumu ambayo wamekuwa wakiendelea nayo. Alisema, "Hongereni sana kwa likizo! Ninaamini kila mmoja amefurahia na amejifunza mambo mengi huko nyumbani. Ninaamini tumewasaidia vyema wazazi wetu majukumu mbalimbali". Aliendelea kusema, "Kama tujuavyo, ni utaratibu wetu sisi viongozi kufanya vikao pale tunapokaribia kufunga na tunapofungua shule. Tunafanya hivyo ili kutathmini na kujadiliana kuhusu mambo mbalimbali yanayotuhusu sisi viongozi na kujiwekea mikakati mbalimbali katika muhula mpya. Tumekuwa tukifanya hivyo ili kuhakikisha kunakuwa na mgawanyo mzuri wa majukumu kwa viongozi wote".

Baada ya maelezo hayo, alimkaribisha mwanafunzi aliyeitwa Mbolela ambaye alikuwa katibu ili asome madondoo ya ajenda ya kikao. Baada ya kumaliza kusoma ajenda na madondoo yake, mwenyekiti alimpa nafasi ya **kusoma kumbukumbu za kikao kilichopita** kwa ajili ya kuthibitisha taarifa hizo kabla ya kuendelea na dondoo lingine. Wajumbe walisikiliza na kusahihisha sehemu zilizokuwa na dosari, kisha walithibitisha kuwa zilikuwa kumbukumbu sahihi za kikao kilichopita. Baada ya zoezi hilo, katibu aliruhusiwa kusoma dondoo lililofuata katika ajenda, ambapo mwenyekiti alianza kulifafanua kabla ya kuwapa wajumbe nafasi ya kujadili na kutoa maoni yao. Walipomaliza kujadili madondoo yote ya msingi, waliingia katika dondoo la **mengineyo**. Wajumbe walitaja na kuelezea mambo mengine ambayo hayakujadiliwa katika madondoo ya ajenda ya kikao hicho. Mwishoni, mwenyekiti alisimama kwa ajili ya dondoo la mwisho ambalo lilikuwa kufunga kikao. Mwenyekiti aliwashukuru wajumbe kwa kushiriki, kisha **alifunga kikao**.



Baada ya kikao kufungwa, walimu walimpongeza Zuneka na viongozi wengine kwa kuwa waadilifu katika majukumu ya uongozi waliyopewa. Mwalimu Kitindi aliwasisitizia viongozi hao kusoma kwa bidii kwani elimu ndiyo kila kitu katika maisha. Mwalimu Lungo naye aliongezea kwa kuwaambia viongozi wa wanafunzi kuwa wakipata changamoto yoyote, wasisite kuwaona walimu ili wasaidiane kuzitatua.

Walimu walipomaliza kuzungumza, waliwaruhusu viongozi hao kwenda kuendelea kusimamia shughuli za usafi. Wanafunzi wengi walifurahi kumwona Zuneka kwani walimpenda sana kwa sababu ya jitihada, upendo na uchangamfu wake. Pia, Zuneka alifurahi kuwaona wanafunzi wenzake na aliungana nao katika kazi ya kufyeka nyasi kwani alipenda kushirikiana na wenzake katika kufanya kazi.

Maswali

1. Kutokana na kifungu cha habari ulichokisoma, nini maana ya kumbukumbu za kikao?
2. Vipengele gani huzingatiwa katika kuandika kumbukumbu za kikao?
3. Maneno “ajenda” na “dondoo” kama vipengele vya kumbukumbu za kikao vinatofautianaje?
4. Kuna umuhimu gani wa kusoma kumbukumbu za kikao kilichopita?

Zingatia

Kumbukumbu za kikao huandikwa ili kusaidia utekelezaji na ufuatiliaji wa mambo yaliyojadiliwa, kuridhiwa, kuazimiwa au kuamuliwa katika kikao. Pia, huwa ni marejeleo ya waliohudhuria, maadhura, pamoja na mambo mengine yaliyofanyika. Hivyo, kumbukumbu za kikao ni muhtasari unaoandikwa kwenye kikao kuelezea mambo yaliyojadiliwa na uamuzi uliofikiwa katika kikao. Kumbukumbu huandikwa kwa ufupi kwa kudondoa mambo muhimu ili kutoa picha ya jumla ya yaliyojiri kikaoni. Katika uandishi wa kumbukumbu za kikao, katibu anapaswa awe na stadi za kusikiliza na kuandika ili aweze kufupisha mambo yanayojadiliwa na kukubaliwa wakati wa kikao. Kumbukumbu za kikao zina mpangilio maalumu ambao huhusisha kichwa cha kumbukumbu, orodha ya waliohudhuria na wasiohudhuria, pamoja na ajenda ya kikao.

Vilevile, huzingatia hoja muhimu tu kwa sababu mambo mengi hujadiliwa kikaoni. Kadhalika, uwasilishaji wake hutumia mtindo mwepesi na sentensi zake huwa kamilifu ili zieleweke kirahisi kwa atakayezisoma.

Kikao chochote lazima kiwe na ajenda. Ajenda hubeba madondoo yanayopaswa kujadiliwa katika kikao husika. Madondoo hayo hujumuisha utangulizi unaobeba vipengele vya ufunguzi wa kikao, matangazo na uthibitisho wa kutimia kwa akidi. Kama kikao kitajadili kumbukumbu za kikao kilichotangulia, kutakuwa pia na dondoo la kupitia kumbukumbu za kikao kilichopita, kisha linafuata dondoo la

masuala mengine yatakayozungumziwa. Dondoo lingine ni mengineyo, ambapo mambo ambayo hayakujadiliwa katika madondoo ya msingi hudokezwa. Aidha, dondoo la kufunga kikao hujumuishwa katika ajenda, ambapo kikao huahirishwa au kufungwa. Wakati wa kikao, katibu huandika tini za kumbukumbu, na baada ya kikao, huandaa kumbukumbu za kikao kwa kuziandika kikamilifu.

Shughuli ya 6.5

Shirikiana na wenzako kuandaa igizo la kikao cha darasa lako. Kama katibu andika kumbukumbu za kikao hicho.

Zingatia

Kumbukumbu za kikao huwa na sehemu tatu. Sehemu ya kwanza huundwa na vipengele, ambavyo ni mada au kichwa cha kumbukumbu. Kichwa huandikwa kwa herufi kubwa na kwa wino uliokozwa. Vipengele vingine ni walengwa wa kikao, lengo la kikao, mahali kikao kilipofanyika, tarehe ambayo kikao kilifanyika, na muda ambapo kikao kilianza.

Sehemu ya pili ni mahudhurio, ambayo hubainisha orodha ya watu waliohudhuria na wasiohudhuria kikao. Orodha ya wasiohudhuria kikao huonesha waliotoa taarifa na ambao hawakutoa taarifa. Vilevile, huweza kuonesha waliohudhuria kwa kualikwa. Wasiohudhuria wanaweza kubainishwa endapo kikao kinahusisha watu wachache. Kwa kikao kinachohusisha watu wengi, ni vigumu kuorodhesha wale ambao hawakuhudhuria. Hivyo, idadi ya waliohudhuria tu ndiyo huorodheshwa.

Sehemu ya tatu ni ajenda. Kikao huwa na ajenda moja, ambayo huwa na madondoo kadhaa. Madondoo huandikwa kwa kifupi na huorodheshwa kwa mfuatano wa namba. Uwekaji wa namba hurahisisha urejeleaji wa kumbukumbu. Dondoo la kufungua kikao huelezea muda ambao kikao hufunguliwa na anayefungua. Pia, dondoo la kupitia kumbukumbu za kikao kilichopita hujumuishwa, kama lipo. Kwa kawaida, upitiaji hufanyika iwapo kikao hicho ni mwendelezo wa kikao kilichopita. Hivyo, wajumbe wa kikao hupaswa kuyapitia yaliyojadiliwa katika kikao kilichopita ili kuthibitisha kuwa ni kumbukumbu sahihi. Dondoo la kupitia kumbukumbu za kikao kilichopita halitakuwapo endapo kikao kinafanyika kwa mara ya kwanza. Mapitio ya kumbukumbu za kikao kilichopita hufuatiwa na dondoo la yatokanayo na kumbukumbu za kikao kilichopita kwa lengo la kujua utekelezaji wa maamuzi na maazimio ya kikao. Dondoo la yatokanayo na kumbukumbu za kikao kilichopita hufuatiwa na madondoo yanayohusu mambo yanayojadiliwa katika kikao kilichopo. Uamuzi uliofikiwa kutokana na madondoo hayo, hutambulishwa kwa maneno kama vile iliamuliwa, iliazimiwa, ilihojiwa, iliagizwa, ilishauriwa na ilielezwa. Maneno hayo huandikwa kwa herufi kubwa na wino uliokozwa ili yaweze kusomeka kirahisi.

Dondoo la mwisho ni kufunga kikao. Dondoo hili huelezea muda ambao kikao hufungwa na anayefunga, pamoja na cheo au wadhifa wake. Mwishoni mwa kumbukumbu za kikao huandikwa jina la katibu na mwenyekiti wa kikao, ambao huweka saina zao na kuandika tarehe ili kumbukumbu ziwe rasmi. Uandishi wa kumbukumbu hutumia njeo ya wakati uliopita na kauli ya utendwa ili kuonesha kwamba yaliyoandikwa ni makubaliano ya kikao na si maamuzi ya mtu mmoja. Pia, huwa na mambo muhimu yaliyojadiliwa ambayo huandikwa kwa lugha rahisi na sentensi kamili ili yaeleweke.

Shughuli ya 6.6

Tafuta kumbukumbu za kikao kutoka chanzo chochote cha maarifa, kisha chambua vipengele muhimu vilivyotumika katika kumbukumbu hizo.

Zoezi la 6.2

1. Ni changamoto gani zinazoweza kujitokeza endapo kumbukumbu za kikao hazitaandikwa kabisa au zitaandikwa vibaya?
2. Elezea hatua za kufuata wakati wa kuandika kumbukumbu za kikao.
3. Elezea sifa za mwandishi wa kumbukumbu za kikao.

Shughuli ya 6.7



Soma mfano ufuatao wa kumbukumbu za kikao, kisha fanya yafuatayo:

- (a) Bainisha taarifa zinazojitokeza katika kichwa cha kumbukumbu;
- (b) Bainisha muundo wa kumbukumbu; na
- (c) Elezea namna hoja zilizojadiliwa zinavyoandikwa kwenye kumbukumbu.

**KUMBUKUMBU ZA KIKAO CHA VIONGOZI WA SERIKALI
YA WANAFUNZI WA SHULE YA SEKONDARI IGOMBA
KILICHOFAANYIKA TAREHE 05 JUNI 2024 KATIKA UKUMBI WA
SHULE YA SEKONDARI IGOMBA**

MAHUDHURIO

(a) Waliohudhuria

1. Maputo Mkarara - Mwenyekiti
2. Zuneka Nyasuma - Mwenyekiti msaidizi
3. Mbolela Walwa - Katibu
4. Kajuju Mwakatope - Mjumbe
5. Kandida Sitembei - Mjumbe
6. Nyabusu Kajige - Mjumbe
7. Katembo Bulugu - Mjumbe

(b) Waalikwa

1. Kalika Loungo - Mwalimu wa zamu
2. Itika Gakitindi - Mwalimu wa unasihi

(c) Maadhura

1. Mpita Peter - Mjumbe
2. Bushagala Kapango - Mjumbe

(d) Wasiohudhuria

1. Nazurula Sichoki - Mjumbe
2. Mwaifanga Mkuniza - Mjumbe

AJENDA

1. Kufungua kikao
2. Kupitia kumbukumbu za kikao cha tarehe 06 Oktoba 2023
3. Yatokanayo na kumbukumbu za kikao kilichopita
4. Tathmini ya utendaji kazi wa viongozi kwa muhula wa kwanza wa Januari - Juni 2024
5. Mgawanyo wa majukumu kwa muhula wa pili wa Julai - Disemba 2024
6. Mengineyo
7. Kufunga kikao

Dondoo Na. 1: Kufungua Kikao

- 1.1 Kikao kilifunguliwa saa 3:00 asubuhi kwa salamu na taarifa fupi ya ukaribisho kutoka kwa mwenyekiti.

Dondoo Na. 2: Kupitia Kumbukumbu za Kikao cha Tarehe 06 Oktoba 2023

- 2.1 Kumbukumbu zilizosomwa na katibu na ILIKUBALIWA kuwa yaliyoandikwa ndiyo yaliyojadiliwa.

Dondoo Na. 3: Yatokanayo na Kumbukumbu za Kikao Kilichopita

- 3.1 ILIARIFIWA kuwa ufadhili wa wanafunzi wenye ulemavu umeshapatikana na kwamba utaanza kutolewa ndani ya miezi mitatu ijayo.
- 3.2 ILIFAFANULIWA kuwa wanafunzi wote waliokuwa wamesimamishwa masomo wamerejeshwa kwa sharti la kujirekebisha tabia zao.

Dondoo Na. 4: Tathmini ya Utendaji kazi wa Viongozi kwa Muhula wa Kwanza wa Januari - Juni 2024

- 4.1 ILIARIFIWA kwamba tathmini ya utendaji kazi wa viongozi kwa muhula wa kwanza wa masomo ilifanyika. Tathmini hiyo ilifanyika kwa kuangalia bidii ya viongozi katika kutekeleza majukumu waliyopangiwa, weledi, ufanisi, na ushirikiano baina yao viongozi pamoja na ushirikiano walioupata kutoka kwa walimu na wanafunzi wote.
- 4.2 ILIARIFIWA kuwa baadhi ya viongozi walitekeleza majukumu yao vizuri. Viongozi hao ni:
- (i) Hawa Jumanne – Kidato cha IIA
 - (ii) Baraka Amani – Kidato cha IIB
 - (iii) Nyemi Semwe – Kidato cha III
- 4.3 ILIARIFIWA kuwa kulikuwa na viongozi waliolegalega. Hawa walihimizwa kufanya vizuri.
- 4.4 ILIELEZWA kuwa kulikuwa na changamoto mbalimbali za utendaji kazi wao katika muhula wa kwanza kama vile uzembe na utoro.

Dondoo Na. 5: Mgawanyo wa Majukumu kwa Muhula wa Pili wa Julai - Desemba 2024

- 5.1 ILIJADILIWA na KUKUBALIWA kuwa na mgawanyo mpya wa majukumu ili kila kiongozi apate uzoefu wa kusimamia majukumu mbalimbali shuleni.
- 5.2 ILIHIMIZWA kuwe na ushirikiano na bidii katika kazi baina ya viongozi ili kuleta maendeleo katika shule yao.

Dondoo Na. 6: Mengineyo

- 6.1 YALIPENDEKEZWA mambo mbalimbali kwa ajili ya kuboresha mazingira ya shule. Mambo hayo ni kuongezwa kwa vifaa vya kufanyia usafi, ukarabati wa viwanja vya michezo na kuongezwa kwa vitabu ili kila mwanafunzi apate fursa ya kujisomea bila kusumbuliwa.
- 6.2 ILISHAURIWA kuanzishwe mradi wa ugawaji wa taulo za kike shuleni ili kuwasaidia wasichana ambao hushindwa kuhudhuria masomo wakiwa katika hedhi.

Dondoo Na. 7: Kufunga Kikao

7.1 Kikao kilifungwa na Mwenyekiti saa 6:30 mchana. Aliwashukuru wajumbe kwa ushirikiano na michango yao ya mawazo.

7.2 Zimeandaliwa na:

Mbolela Walwa (Katibu)

Saini: Tarehe: 9-7-2024

Zimeidhinishwa na:

Zuneka Nyasuma (Mwenyekiti msaidizi)

Saini: Tarehe: 9-7-2024

Zimethibitishwa na:

Maputo Mkarara (Mwenyekiti)

Saini: Tarehe: 9-7-2024

Shughuli ya 6.8

Kwa kutumia vyanzo mbalimbali, sikiliza au tazama video ya kikao chochote, kisha andika kumbukumbu za kikao hicho.

Zoezi la marudio

1. Jibu maswali yafuatayo kwa kuchagua herufi ya jibu sahihi:

(i) Aina gani ya insha inahusu sifa mahususi za kitu au mtu fulani?

- (a) Hoja
- (b) Zisizo za kisanaa
- (c) Wasifu
- (d) Kisanaa
- (e) Hoja za kisanaa

(ii) Kwa nini dondoo za kikao huandikwa?

- (a) Ili kubaini waliohudhuria.
- (b) Ili kubainisha mawazo ya msingi ya kikao.
- (c) Ili kufuatilia utekelezaji wa maamuzi na maazimio ya kikao.
- (d) Ili kubaini muda wa kikao.
- (e) Ili kubaini mengineyo.

(iii) Dondoo gani katika ajenda husaidia na hurahisisha utekelezaji wa mambo yaliyokubaliwa katika kikao kilichopita?

- (a) Dondoo za ajenda
- (b) Kumbukumbu za kikao
- (c) Mengineyo katika kikao
- (d) Ajenda za kikao
- (e) Yatokanayo

(iv) Kipengele gani huonesha idadi ya wajumbe waliofika na wasiofika kwenye kikao?

- (a) Kichwa cha kumbukumbu
- (b) Ajenda
- (c) Mengineyo
- (d) Yatokanayo
- (e) Mahudhurio

(v) Aina gani ya insha huandikwa kwa lengo la kutetea au kupinga jambo?

- (a) Zisizo za kisanaa
- (b) Hoja
- (c) Kisanaa
- (d) Wasifu
- (e) Wasifu za kisanaa

2. Fafanua tofauti zilizopo kati ya insha za kisanaa na insha zisizo za kisanaa.
3. Kuna tofauti gani kati ya insha za wasifu na insha za hoja?
4. Kuna umuhimu gani wa kuandika kumbukumbu za kikao?
5. Nini kitatokea endapo kumbukumbu za kikao hazitaandikwa wakati kikao kinaendelea?

Faharasa

Ajenda	orodha ya mambo yatakayozungumzwa kwenye kikao au mkutano
Akidi	idadi ya chini ya wajumbe au washiriki inayopaswa kufikiwa ili kikao au mkutano uweze kufanyika
Buka	huzuni, sikitiko, msiba
Dhamana	kitu au ahadi inayotolewa kumdhamini mtu anayetaka kukopa mali au anayekabiliwa na mashitaka mahakamani
Dodosa	kitendo cha kumdadisi mtu kwa kumuulizauliza maswali
Dondoo	kipengele cha ajenda ya kikao au mkutano
Faragua	tengeneza kitu papo hapo kwa kutumia rasilimali zilizopo
Jekejeke	jasho linalomtoka mtu
Karandinga	gari la magereza linalotumika kuwasafirisha watuhumiwa na wafungwa
Kasri	jumba la kifalme
Korokoroni	gerezani, kifungoni
Mahabusu	mahali ambapo watuhumiwa wa kesi hufungwa.
Manusura	mtu aliyeponea chupuchupu katika tukio kama vile ajali au mafuriko
Shitaka	madai au malalamiko ambayo mtu anayatoa dhidi ya mtu mwingine
Nasaha	mawaidha, ushauri au mwongozo mzuri katika jambo fulani
Ujira	malipo kwa ajili ya kazi iliyofanywa

Ujuha	hali ya upungufu wa uwezo wa kufikiri na kuelewa mambo
Uwekevu	hali ya kutumia kitu au mali kwa uangalifu au kwa kiasi
Wadia	fika
Wasifu	maelezo kuhusu mtu au kitu yanayojumuisha tabia, matendo, mienendo yake n.k
Zuzu	mtu anayeshindwa kutumia akili yake hata akielezwa